

ହିବୁମାନଙ୍କୁ ଲିଖିତ ପତ୍ର ଏବଂ ଲକ୍ଷ୍ମୀତାଙ୍କ ରାଠିତି ଆକୁ ମୂଲ୍ୟ ହାତୀ

ଏହି ପତ୍ର ର ରାହାଁ ହାନି ପତି । ପ୍ଲୁଃଇ ମେରାତି ହାରେକା ମାହାପୁରୁ ଅଶ୍ପୁତି ବଲୁୟା ପ୍ଲୁଃଆଇ ଆହାମାନି କାତା ଇମ୍ପାଆଁ ମେସାଲି ଆଡ଼ିମାନାୟି । ଇ ପତି ର ନେହଁ କାତାତି ଖେହ୍ନି ପତି । ଇମ୍ପାଆଁ ତାନିକଡ଼ିଟିଏ ହାରେକା ପ୍ଲୁଃଇ ମେରାତି କାତାୟା ରାସ୍‌କି ଆହାମାନୁ । ଜୀସୁ କ୍ରୀସ୍ତ ଏନିକଁ ମାହାପୁରୁ ଅଶ୍ପୁତି ବଲୁ ଅଡେ ଜୀହୁଦି ପୂଜେରାଜା କାମା ପୂରା କିତେସି ଇମ୍ପାଆଁ ମାର ମେସାଲି ଆଡ଼ିମାନାୟି ।

ଇଦାଆଁତାକି ଇ ପତି ଜୀହୁଦି କ୍ରୀସ୍ତାନା ଲକ୍ଷ୍ମଣି ସାସା ଅଡେ ବାସୁଁ ହାନି ପତି । ଏହି ପତି ଖେସିମାନେ, ଜୀସୁ ଏନିକଁ ମେରାତି ପୂରା କିତେସି, ଏନିକଁ ପୂଜେରାଜା ଅଡେ ଖେଶ୍ଟେ ପୂଜା ହାହାଲି ଲଡ଼ା ହିଲେଏ । ଜୀସୁ କ୍ରୀସ୍ତ ବାରେ କାଲେଏତାକି ରଣ୍ଡିଏ ଦେବା ପାପୁତି ପୂଜା ହୀତେସି । ନୀଏତି ଜୁଗୁତି କ୍ରୀସ୍ତାନା ଲକ୍ଷ୍ମଣି ଏହି ପତି ସାସା ଅଡେ ବାସୁଁ ତସିମାନେ । କ୍ରୀସ୍ତ ମାଲେ ମାହାପୁରୁ ତାଣା ବାସୁଁ କିଞ୍ଜିକିହାଲି ଆଡ଼ାମାଜାନେସି । ଅଡେ ଏଞ୍ଜାଣି ତାଣା ବାସୁଁ ଇଟାନା ତାକିନ ୧୨:୨ ।

ଏହି ପତି ଆମ୍ପାଆସି ରାଡ଼ାମାନେସି ପୁଣ୍ଡି ଆହା ହିଲେଏ, ସାମା ବୁଦିଗାଟାରି ଏଲେ ଇଞ୍ଜିମାନେରି ପାଣ୍ଡିଆହାମାନି ପାଞ୍ଜୁଲ, ଲୁକ, ଆଆତଁ ବର୍ନବା ଆହାଡ଼ିନେରି । ଇଦାନି ରାଠିତି କାଲମି ଜିକେଏ ପୁନାଆତାୟି, ସାମା ହାରେକା ଲକ୍ଷ୍ମଣି ଏଲେଇନେରି ଇଦି ଜୀସୁ କ୍ରୀସ୍ତ ଜାର୍ନାଆଡ଼ି ୭୦ ବାସା ତାୟୁ ରାସ୍‌କି ଆହାମାନେ । ଇତିହଁ ଜିରୁସାଲମ ଇଲୁ କ୍ରୀସ୍ତ ଜାର୍ନାଆଡ଼ି ୭୦ ବାସା ତାୟୁ ନାସା ଆଡେ ସାମା ଇ ଆକୁତି ରାଠିନାସି ଇଦି ନାସା ଆଆତିଲେହେ ରାଠିମାନେସି ।

ଏହି ପତି ରମ୍ ଗାଡ଼ାତା ରାସ୍ କି ଆହାମାତେ ୧୩:୨୪ ଅଡ଼େ ହାରେକା କୁଲମିକାଣା ବାଟିକିଞ୍ଜି ଆହାମାତେ ।

ପତିତା ମାନାୟି

୧. ଜୀସୁ କ୍ରୀସ୍ତ ମାହାପୁରୁ ଅଣ୍ପୁତି ବଲୁ ଖେହ୍ନାସି ଅଡ଼େ ଦୂତୁୟାଁ କିହାଁ ଜିକେଏ କାଜାସି । ୧:୧-୪:୧୩
୨. ଜିରୁସାଲମତା ସେବା କିହ୍ମାନି ପୂଜେରାଜ୍ଞା କିହାଁ ଜିକେଏ ଜୀସୁ କାଜାସି । ୪:୧୪-୭:୨୮
୩. ମାହାପୁରୁ ମସାକି ମେରା ହୀହାନା ତାନି ଲକୁତଲେ କିହାମାଟି ରାଜିମାନା କିହାଁ ଜୀସୁତି ସେବା କାମା କାଜାୟି । ୮:୧-୧୦:୩୧
୪. ଜୀସୁଇଁ ବାରେ ତାଣା କାଜାସି କିହାନା ଖେସାମାନେସି । ୧୦:୩୨-୧୩:୧୭
୫. ସାସା ଅଡ଼େ ବାସୁତି କାତା ଖେସାନା ଜହରା ତଲେ ଆକୁତି ରାପ୍ନାୟି । ୧୩:୧୮-୨୫

ମୀରୁଏଶା ତାଣାଟି ମାହାପୁରୁତି ବଲୁ

^୧ ମାହାପୁରୁ ତଲି କାଲତା ଏଟକା ଏଟକା ଚାୟୁତା ଅଡ଼େ ଏଟକା ଏଟକାଟି ମାହାପୁରୁ ଅଣ୍ପୁତି ବଲୁ ଖେହ୍ନାରି ତାଣାଟି ମା ଆକୁ ଆବାୟାଣି କାତା ଖେସାମାଚେସି, ^୨ ସାମା ଇ ରାନ୍ତି ବେଲତା ମୀରୁଏଶା ତାଣାଟି ମାଜେ କାତା ଖେସାମାଜାନେସି । ଏଞ୍ଜାଣାଇଁ ଏଞ୍ଜାସି ବାରେତି ମୁହେଁ କାଜାସି କିହାଁ ଆଚାମାନେସି, ଏଞ୍ଜାଣି ତାଣାଟି ହାଗୁପାକା ଦାର୍ତି ବାରେ ଗାଡ଼ିକିଡେସି; ^୩ ଏ ମୀରୁଏସି ତାନି ଡ଼ାଞ୍ଜିମାନି ଗାଖୁରମିତି ଉଜେଡ଼ି ଅଡ଼େ ଏଞ୍ଜାଣି ଖାଣା ମାନେ, ଏଞ୍ଜାସି ତାନି ବାଡ଼ୁୟୁ ଗାଟି ବଲୁ ତଲେ ବାରେ ଦାର୍ତିତି ସାଲୁଞ୍ଜି କିନେସି, ଇଞ୍ଜା ମା ପାପୁ ବାରେ ମ୍ଲେକ୍ସି ଡ଼ାୟୁ ଲାକପୁରୁତି ବାଡ଼ୁୟୁ ଗାଟି ମାହାପୁରୁତି ଚିଃନି ଚଟତା କୁଗାମାନେସି ।

ମାହାପୁରୁ ମୀରୁଏସି ବାରେକିହାଁ କାଜାସି

^୪ ମୀରୁଏସି ଏନିକିଁ ଲାକପୁରୁତି ଦୂତୁୟାଁ କିହାଁ ହାରେକା କାଜା ଦରୁତି ଅଦିକାରା ବେଟାଆହା ମାନେସି, ଏଲେକିହାଁଏ ଏଞ୍ଜାସି ଏଞ୍ଜାସିକା କିହାଁ ହାରେକା କାଜାସି ଆହାମାନେସି । ^୫ ଇତିହାଁ

ମାହାପୁରୁ ଦୂତୁୟାଁ ବିଦ୍ରାଟି ଆମ୍ବାଆରାଇଁ ଏଚେଲା ଏଲେଇଞ୍ଜା
ହିଲଅସି,

“ନାନୁ ନା ମୀରଏଣାତି,

ନୀଞ୍ଜୁଟିଏ ନାନୁ ନୀ ତାଞ୍ଜିତେଏଁ”

ଅଡ଼େ ଜିକେଏ ମାହାପୁରୁ ଏଲେଇଚେସି,

“ନାନୁ ମୀ ଆବାତେଏଁ ଆହାମାଇଁ,

ଅଡ଼େ ନାନୁ ନା ମୀରଏଣାତି ଆଡ଼ି ।”

୬ ଅଡ଼େ ମାହାପୁରୁ ତାନି ପାଣ୍ଡା ମୀରଏଣାଇଁ ଅଡ଼େ ଖେଣ୍ଡେ
ଦାରତିତା ପାଣ୍ଡାତେସି, ଏ ବେଲାତି ସିନିକିହାନା ଏଲେଇନେସି,
“ମାହାପୁରୁତି ବାରେ ଦୂତୁୟାଁ ଏଞ୍ଜାଣାଇଁ ଜହରା କିପେରି ।”

୭ ର ଖାକିଟି ମାହାପୁରୁ ଦୂତୁୟାଁ କାତା ଏଲେଇଞ୍ଜି ମାନେସି,

“ମାହାପୁରୁ ତାନି ଦୂତୁୟାଁଇଁ ଗାଲି ଲେହେଁତି ଜୀଞ୍ଜୁ ହୀନେସି,

ଅଡ଼େ ତାନି ସେବା କିନାରାଇଁ ହିରୁ ଗୁଦ୍‌ଞ୍ଜା ଲେହେଁ କିନେସି ।”

୮ ଅରଞ୍ଜାକି ମାହାପୁରୁ ତାନି ମୀରଏଣା ତାକି ଏଲେଇଞ୍ଜି ମାନେସି,

“ଏ ମାହାପୁରୁ ନୀ ସିଂଗାସାଣି କାଲାକାଲା ତାକି ଡ଼ୟିନେ,

ଅଡ଼େ ନାନୁ ସାଲଞ୍ଜି କିନାୟି ନୀହାୟି ତଲେ ଆଡ଼େ ।

୯ ନାନୁ ଦାମ୍ବୁ ଗାଟାଣାଇଁ ଜୀଞ୍ଜୁ ନହୁଁ ମାଞ୍ଜି

ଅଡ଼େ ଦାମ୍ବୁ ହିଲାଆଗାଟାରାଇଁ ଅପାହିଲଅତି,

ଏଦାଆଁତାକି ମାହାପୁରୁ ନୀ ମାହାପୁରୁ ନିଙ୍ଗେ ଆଚାନେସି,

ମୀ ତଡ଼େସିଙ୍ଗା କିହାଁ ନିଙ୍ଗେ ହାଡ଼େକା ରାହାଁତି ନିୟୁଁ ଖାକ୍‌ହାନା

ନିଙ୍ଗେ ଆଚାନେସି ।”

୧୦ ଏଞ୍ଜାସି ଅଡ଼େ ଖେସିମାନେସି,

“ଏ ପ୍ରୁ, ନାନୁ ମୁଲୁଏ ଦାରତିତି ପୁନାଦି ଗାଡ଼ିକିତି,

ଅଡ଼େ ହାଗୁପାକା ବାରେ ନୀ କେୟୁତଲେ କେପିତି ।”

୧୧ “ଏ ବାରେ ର ଦିନା ମେଣ୍ଡାହାନେ, ସାମା ନାନୁ କାଚଲଏ ଡ଼ୟିଦି;

ଅଡ଼େ ଏ ବାରେ ପ୍ଲାଞ୍ଜ ହିମ୍ବୁରିକା ଲେହେଁ ଗେଞ୍ଜା ହାନୁ

୧୨ ଅଡ଼େ, ନାନୁ ହିମ୍ବୁରି ଲେହେଁ, ହାଅ, ହିମ୍ବୁରି ଲେହେଁ ମୁଦାକିଦି

ଅଡ଼େ ଏଞ୍ଜି ବାରେ ହିମ୍ବୁରିକା ଲେହେଁ ବାଦ୍‌ଲି ଆନୁ;

ସାମା ନାନୁ ବାରେବେଲା ଏଞ୍ଜାତିଏ,

ଅଡ଼େ ନୀ ଜୀଞ୍ଜୁ ଏଚେଲାଞ୍ଜା ରାଏ ।”

୧୩ ମାହାପୁରୁ ତାନି ଦୂତୁୟାଁଇଁ ଏଚେଲାଝା ଏଲେଇଞ୍ଜା ହିଲଅସି,
 “ନାନୁ ନୀ ସାତୁୟାଁଣି ନୀ କତାୟାଁ ଡ଼ଇ ଇଗାଆ ପାତେକା
 ନୀନୁ ନା ଚିଃନି ଚଟତା କୁଗାମାନାମୁ ।”

୧୪ ଆତିହୁଁ ଲାକପୁରୁତି ଦୂତୁୟାଁ ଆମ୍ବାଆରି ? ଏଞ୍ଜାରି
 ଆହିମାନେରି ମାହାପୁରୁତି ସେବା କିନାରି ମାଣ୍ଠସିୟାଁଇଁ ସାୟେମି
 କିହାନା ଗେଲପାଲିତାକି ମାହାପୁରୁ ତାଣାଟି ପାଣ୍ଡୁଆଡ଼ି ଜୀଝୁୟାଁ ।

୨

ଗେଲପିନାୟି

୧ ଏଦାଆଁତାକି, ମାରୁ ଝେଞ୍ଜାମାନି କାତାତି ହାରେକା ଝେଞ୍ଜାଲି ମନ
 ହୀନାୟି ମାନେ, ଆଆତୁଁ ମାରୁ ଏଚେତା ଜିରୁ ବାଣ୍ଠି ଆଆୟି
 । ୨ ଇତିହୁଁ ନକେଏ ଲାକପୁରୁତି ଦୂତୁୟାଁ ତାଣାଟି ଏଲେଇଞ୍ଜା
 ମାନେସି, ଏଦି ସାତା ଇଞ୍ଜୁଁ ତୀରିଆହାଁ ମାନେ, ଅଡ଼େ ଆମ୍ବାଆରି
 କାତା ଆହୁଆନା ମାନୁଞ୍ଜି ଆହାହିଲଅରି, ଏଞ୍ଜାରି ତାମ୍ବୁବେଟାଆନ୍ତି
 ତଣ୍ଡୁ ବେଟାଆହାମାନେରି । ୩ ଆତିହୁଁ ଇଲେତି ଗେଲପିନାୟିଇଁ
 ହେଲା କିତିହୁଁ ମାରୁ ଏନିକୁଁ ଗେଲହିନାୟି ? ଏଦି ନକେଏ
 ପ୍ରବୁ ତାଣାଟି ଝେସ୍ପି ଆହାଁ ଝେଞ୍ଜାମାନି ଲକୁ ତାଣାଟି ମା ତାଣା
 ଝେସ୍ପିଆହାମାନାୟି ସାତା ଆହାମାନେ; ୪ ଏଦାଆଁତାକି ମାହାପୁରୁ
 ଜିକେଏ ତାନି ମନତଲେ ହାରେକା ସିନାୟାଁ ଅଡ଼େ କାବାଆନ୍ତି
 କାମାୟାଁ ଇଞ୍ଜା, ବାଡ଼ୁଗାଟି କାମାୟାଁ ଅଡ଼େ ସୁଦୁଜୀଝୁତି ଏଟକା
 ଏଟକାତି ଦାନା ହୀହାନା ସାକି ହୀହାମାନେସି ।

ଜୀସୁ ମାଣ୍ଠସି ଝାଣା ଆଡ଼େସି

୫ ମାହାପୁରୁ ଆମିନି ପୁଃନି ଦାରତିତି ଗାଡ଼ି କିନେସି, ଅଡ଼େ ଆମିନି
 ଦାରତିତି କାତା ମାମ୍ବୁଞ୍ଜେସିମାଞ୍ଜାନମି, ଏଦାନି ଅଦିକାରା କିହାଲି
 ଏଞ୍ଜାସି ଲାକପୁରୁତି ଦୂତୁୟାଁ କେୟୁତା ହେର୍ପା ହିଲଅସି । ୬ ସାମା
 ରଅସି ର ଗାୟୁତା ସାକି ହୀହାମାନେସି;

“ଏ ମାହାପୁରୁ, ମାଣ୍ଠସି ଆମ୍ବାଆସି, ନୀନୁ ଏଞ୍ଜାଣାଇଁ ଅଣ୍ଡପିମାଞ୍ଜି ?

ମାଣ୍ଠସି ମୀରୁଏସି ଆମ୍ବାଆସି ନୀନୁ ଏଞ୍ଜାଣି ଜାଡ଼ୁ ଅହିମାଞ୍ଜି ?

୭ ନୀନୁ ଏଞ୍ଜାଣାଇଁ ଲାକପୁରୁତି ଦୂତୁୟାଁ କିହାଁ ରଚାଣି ଉଣା କିହାମାଞ୍ଜି;

ନାନୁ ଏଞ୍ଜାଣାଙ୍କ ଗାଞ୍ଜୁରମି ଅଡ଼େ ମାନିତି ଟପେରି ତୁରଞ୍ଜି କିହାମାଞ୍ଜି,

「ନାନୁ ବାରେ ଏଞ୍ଜାଣି କଡ଼ାୟାଁ ଡ଼ଇ ଇଟାମାଞ୍ଜି ।」

ସାତେଏ ମାହାପୁରୁ “ବାରେତି” ଇତିହାସି ଏନାଆଁଞ୍ଜା ପିହୁଆନା ବାରେତି ତାନି କଡ଼ାଁ ଡ଼ଇ ଇଟାମାନେସି; ଆଡ଼ିଜିକେଏ ମାରୁ ନୀଏଁ ପାତେକା ବାରେ ତାନି ଡ଼ଇ ଆହାମାନାଣି ମେସି ହିଲାଆୟି ସାତା । ୯ ମାରୁ ମେସିମାନାୟି ଲାକପୁରୁତି ଦୁଡ଼ୁୟାଁ କିହାଁ “ଇତାନି ଉଣା” କିଞ୍ଜିଆହା ମାଚେସି, ଏଞ୍ଜାଣାଙ୍କ ଇତିହାସି ଜୀସୁଙ୍କ ହାକିତି ଦୁକୁ ବେଟା ଆହାମାନାକି ଗାଞ୍ଜୁରମି ଅଡ଼େ ମାନିତି ଟପେରି ତୁରହା ମାନାଣି ମେସିମାନାୟି, ଏନିକିଁ ମାହାପୁରୁତି କାର୍ମାଟି ବାରେ ମାଣ୍ଡସିୟାଁ ତାକି ଏଞ୍ଜାସି ହାକିତି ଖାଣ୍ଡା ମାନେସି । ୧୦ ଇତିହାସି ଆମ୍ବାଆରି ତାକି ଇଞ୍ଜା ଆମିନି ଗାଟାଣା ତାଣ୍ଡାଟି ବାରେ ଗାଡ଼ି ଆହାମାନେ, ହାରେକା ମୀରକାଣି ଜୀସୁତି ଗାଞ୍ଜୁରମି ପାଣ୍ଡପି କିହାଲି, ଜୀସୁ ଦୁକୁ କସ୍ତ ବେଟାଆହାମା ଏଞ୍ଜାରାଇ ଗେଲ୍‌ପିନି ଜିରୁତା ଅନେସି ।

୧୧ ଆମ୍ବାଆସି ପାପୁଟି ସୁଦୁ କିନେସି ଅଡ଼େ ଆମ୍ବାଆରି ସୁଦୁ ଆନେରି, ଏଞ୍ଜାରି ବାରେ ରଣ୍ଡିଏ ତାଞ୍ଜିତି ମୀରକା; ଏନାଆଁତାକି ଏଞ୍ଜାରାଇଁ ଜୀସୁ ତାୟି ତାଜି ଇଞ୍ଜାଲି ଲାଜା ଆଅସି, ୧୨ ଏଞ୍ଜାସି ମାହାପୁରୁଙ୍କ ଏଲେଇଞ୍ଜି ମାନେସି,

“ନାନୁ ନା ତାୟି ତାଜିସ୍ତା ନକିତା ନୀ ବାରେ କାମା ଝେକ୍‌ଇଁ,

ବାରେ କୁଲମି ନକିତା ନୀ ଜହରା ପାଚୁ ପାଡ଼ିଇଁ ।”

୧୩ ଅଡ଼େ ଝେଣ୍ଡେ ଏଲେଇଞ୍ଜି ମାନେସି, “ନାନୁ ଏଞ୍ଜାଣି ତାଣା ନା ନାନୁ ତୀରି କିଇଁ ।” ଅଡ଼େ ସିନିକିଦୁ “ମାହାପୁରୁ ନାଙ୍ଗେ ହାହାମାଞ୍ଜାନି ମୀରକା ମାସ୍କା ନା ତଲେ ମାନେରି ।”

୧୪ ଏନାଆଁତାକି ଇତିହାସି ମୀରକା ଉଞ୍ଜା ଅଡ଼େ ନେତେରିତି ଆଞ୍ଜାତା ଆଣ୍ଡାମାନାକି କ୍ରୀସ୍ତ ଜିକେଏ ଏଲେକିହାସି ଏ ମାଣ୍ଡସି ଖାଣ୍ଡା ଆଡ଼େସି, ଏନିକିଁ ତାନି ହାକିତି ସୟତାନଇଁ ନାସା କିନେସି; ଇତିହାସି ହାକି ସୟତାନତି ଅଦିକାରାତା ମାଚେ । ୧୫ ଇଞ୍ଜାଁ ହାକିତି ଆଜିତଲେ ଆମ୍ବାଆରି କାଲେଏତାକି ହଲିୟାଞ୍ଜା ଆହାମା ଦସ୍ତପି ଆହାମାଚେରି, ଏଞ୍ଜାସି ଏଞ୍ଜାରାଇଁ ଗେଲ୍‌ପିନେସି । ୧୬ ଇତିହାସି ଏଞ୍ଜାସି ସାତେଏ ଲାକପୁରୁତି ଦୁଡ଼ୁୟାଁସି ସାୟେମି କିଆନା ଅବ୍ରାହାମତି ମୀରକାଣି

ସାୟେମି କିହିମାନେସି । ୧୭ ଏଦାଆଁତାକି ଏଝାସି ବାରେ ଝାକିଟି ତାନି ତାୟିୟାଁ ଲେହେଁ ଆନାୟି ମାତେ, ଏନିକିଁ ଏଝାସି ବାରେ ଲକୁତି ପାପୁତି ବାଦୁଲି ପୂଜା ହୀହାଲିତାକି ମାହାପୁରୁତି ସେବା କାମାତା ର କାର୍ମାମେହନି ଅଡ଼େ ନାମୁତି କାଜା ପୂଜେରା ଆନେସି । ୧୮ ଇତିହଁ ଏଝାସି ତାନୁ ତାୟିପାରି କିଝି ଆହାଁ ଦୁକୁ ବେଟାଆହା ମାନାକି ତାୟିପାରି କିଝି ଆହିମାନି ଲକୁଣି ସାୟେମି ଆହାଲି ଆଡ଼ିମାନେସି ।

୩

ଜୀସୁ ମସା କିହାଁ କାଜାସି

୧ ଏଦାଆଁତାକି ଏ ନା ସୁଦୁଗାଟି ତାୟିୟାଁ ଅଡ଼େ ତାଜିସ୍ତା ମୀରୁ ଆମିନି ମାହାପୁରୁତି ହାଟ୍‌କି ଆହାମାନି ତାଣା ଆଣ୍ଡାମାନାତେରି ମା ନାମୁତଲେ ପାଣ୍ଡୁଝିଆହାମାନି କାଜା ପୂଜେରା ଜୀସୁତି କାତା ଅଣ୍ଡପାଦୁ; ୨ ମସା ଏନିକିଁ ମାହାପୁରୁ ଇଲୁତା ମାନିତଲେ କାମା କିହାମାତେସି, ଜୀସୁ ଜିକେଏ ଏଲେକିହଁ ତାଜେ ଆଟାମାନି ମାହାପୁରୁ ନକିତା ମାନି ଗାଟାସି ଆଡ଼େସି । ୩ ଇଲୁ କିହାଁ ଇଲୁ କେପିତାସି ଏନିକିଁ ମାନି ବେଟା ଆନେସି, ଏଲେକିହଁଏ ମସା କିହାଁ ଜୀସୁ ହାରେକା ଗାଝୁରମିତି ଜଗେ ଆହାମାନେସି । ୪ ଇତିହଁ ବାରେ ଇଲୁକା ଆମ୍ବାଆରି ଆଆତଁ ଆମ୍ବାଆରି ତାଣାଟି କେପ୍‌ଝି ଆନୁ, ସାମା ମାହାପୁରୁ ବାରେତି ଗାଡ଼ି କିନାସି । ୫ ମସା ମାହାପୁରୁ ଇଲୁତା ହଲେଏସି ଲେହେଁ ନାମୁତଲେ ସେବା କାମା କିହାମାତେସି, ଇଞ୍ଜା ଏମିନି କାତା ମାହାପୁରୁ ତାୟିୟାଁ ଝେସାଲି ମନ କିହାମାତେସି ଏ କାତେଏ ଇଦି । ୬ ସାମା ଜୀସୁ କ୍ରୀସୁ ତାନି ଆବା ଇଲୁତି ମୁହେଁ ମୀରଏଣା ଲେହେଁ ମାନି ଗାଟାସି; ଇଞ୍ଜା ମାର ମା ସାସାତଲେ ଆଞ୍ଜାମାନାଣି ବେଟାଆନାୟି ଇଞ୍ଜାଁ ମା ବାସ୍ତୁତି ତାୟିୟାଁ ପାତେକା ଜାଣ୍ଡେ ଆସା ଡ଼ୟିନ, ଆତିହଁ ମାର ଜିକେଏ ଏଝାଣି ଇଲୁ ଲେହେଁ ଆନାୟି ।

ମାହାପୁରୁ ଲକୁତାକି ଜମିନାୟି

୭ ଏଦାଆଁତାକି ସୁଦୁଜୀଝୁ ଝେସିମାନିଲେହେଁ,
“ନୀଞ୍ଜୁ ମୀରୁ ଏଝାଣି ହାଡ଼ା ଝେଞ୍ଜେରି,

୮ ଆତିହ୍ୟ ମୀ ଆକୁ ଆବାୟାଁ ଲେହେଁ ମୀ ହିୟାତି ଆବୁଝା
କିଆଦୁ, ଲକୁ ହିଲାଆ ବାଟାତା ଏ ଦିନା ଏଝାରି ମାହାପୁରୁଇଁ
ତାୟିପାରି କିହାନା
ଏଝାଣି କପାଟି ନିଙ୍ଗାମାଚେରି,

୯ ଏ ବାଟାତା ମୀ ଆକୁ ଆବାୟାଁ ନାଙ୍ଗେ ତାୟିପାରି କିହାଁ ନାଙ୍ଗେ
ମେସ୍ତାଚେରି,

ଅଡ଼େ ରୀ କଡ଼ି ବାସୀ ପାତେକା ମା କାମା ସିନିକିତେରି ।

୧୦ ଇଦାଆଁତାକି ନାନୁ ଇ କୁଡ଼ାତି ଲକୁଇଁ କାର୍ବି ଆହାନା
ଏଲେଇଚେର୍ବ,

‘ଏଝାରି ବାରେବେଲା ହିୟାତା ମାନି ହିଲାଆ ଗାଟାରି,
ଏଝାରି ନା ଜିରୁ ପୁଞ୍ଜାହିଲଅରି ।’

୧୧ ଇଦାଆଁତାକି ନାନୁ ନା କପାଟି ପାରମାଣା କିତେର୍ବ,

ନାନୁ ଆମିନି ଦେସାତା ଏଝାରାଇଁ ଜମାଲି ହୀତେର୍ବମା ଏ
ଦେସାତା ଏଝାରି ଏଚେଲାଝା ହଡ଼ାଲି ଆଡ଼ଅରି ।”

୧୨ ଏ ତାୟି ତାଙ୍ଗିସ୍ତା, ଜାଗ୍ରାତା, ପାପୁ ଅଡ଼େ ନାମାଆଗାଟି ହିୟାଁ
ମୀ ଆମ୍ବାଆରି ତାଣା ହିଲେଏ, ଏନିକ୍ୟୁ ମୀରୁ ଜୀଝୁଗାଟି ମାହାପୁରୁ
ତାଣାଟି ହେକ ଆଅତେରି । ୧୩ ସାମା ଏଚେତା ପାପୁ ତଲେ ନାଡ଼ିକିଝି
ଆହାନା ମୀ ବିତ୍ରାଟି ଆମ୍ବାଆରି ହିୟାଁ ଆବୁଝା ଆଏ, ଇଦାଆଁତାକି
ନୀଞ୍ଜୁ ଦିନା ମାନାଟିଏ ବାରେଦିନା ରଅତେରି ରଅଣାଇଁ ବାସୁଡ଼ି କାତା
ଜଲାନା ସାୟେମି କିଦୁ; ୧୪ ଇତିହ୍ୟ ନକେଏ ମା ଆମିନି ନାନୁ ମାଚେ,
ଏଦାଆଁ ତାୟି ପାତେକା ଜାଣ୍ଡେ ଆସା ଡ଼ୟିନାୟି ଆତିହ୍ୟ କ୍ରୀସ୍ତ ତାଣା
ଆଣ୍ଡାନା ଡ଼ୟିନାୟି ।

୧୫ ଦାମ୍ବୁ ସାପ୍ତେରିତା ରାସକି ଆହାମାନେ,

“ନୀଞ୍ଜୁ ମାହାପୁରୁତି ହାଡ଼ା ଝେଟିସାରେ,

ଏନିକ୍ୟୁ କାର୍ବି କିଝିକିନି ଚାୟୁତା ଆହାମାଚେ,

ଏଲେକିହ୍ୟୁ ମୀ ଆକୁ ଆବାୟାଁ ଲେହେଁ ହିୟାତି ଆବୁଝା କିଆଦୁ
!”

୧୬ ଆତିହ୍ୟୁ ଆମ୍ବାଆରି ମାହାପୁରୁତି ହାଡ଼ା ଝେଞ୍ଜାନା ଏଝାଣାଇଁ
କାକ୍ତି କିହାମାଚେରି, ମସା ତାଣାଟି ଆମିନି ଗାଟାରି ମିସର ଦେସାଟି
ହଡ଼ା ଝାହାମାଚେରି, ଏଝାରି ବାରେ ଆଏକି ? ୧୭ ଅଡ଼େ ଆମ୍ବାଆରି

ମୁହେଁ ରୀ କଡ଼ି ବାସୀ ପାତେକା ଏଞ୍ଜାସି କାରବି ଆହାମାଚେସି, ଆମ୍ବାଆରି ପାପୁ କିହାମାଚେରି, ଆମ୍ବାଆରି ମଡ଼ା ଲକୁ ଡ଼ୟାଆ ବାଟାତା ରିହାମାଚେ, ଏଞ୍ଜାରି ଆଏକି ? ^{୧୮} ମାହାପୁରୁ ଏଚିବେଲା ପାରମାଣା କିହାନା ଏଲେଇଞ୍ଜାମାଚେସି, ଏଞ୍ଜାରି ଏଚେଲାଞ୍ଜା ମାହାପୁରୁତି ଜ଼ିନି ତାଣା ହଡ଼ଅରି, ଏଚିବେଲା ଏଞ୍ଜାସି ଆମ୍ବାଆରି କାତା ଏଲେଇଞ୍ଜାମାଚେସି ? ଆମ୍ବାଆରି କାତା ମାନଞ୍ଜି ଆହା ହିଲାଆଚେରି, ଏଞ୍ଜାରି ତାକି ଏ କାତା ଏଲେଇଞ୍ଜାମାଚେସି । ^{୧୯} ଇଲେକିହିଁ ନାନୁ ମେସିମାଇଁ, ଏଞ୍ଜାରି ନାମାଆତାକି ଏ ଆଞ୍ଜାମାନି କିଶାନ ଦେସାତା ହଡ଼ାଲି ଆଡ଼ାଆଚେରି ।

୪

^୧ ଏଦାଆଁତାକି ଖାଦୁ ମାର ଜାଗ୍ରାତା ଆନ, ଏଚେତା ତାନି ଜ଼ିନି ତାଣା ହଡ଼ାଲି ଆଞ୍ଜାମାଚି ଜିକେଏ ମୀ ତାଣାଚି ଆମ୍ବା ଆମ୍ବାଆରି ଏମ୍ବାଚି ଏଟକା ଆନିଲେହେଁ ତଞ୍ଜା ଆହିମାନେରି । ^୨ ଇଚିହିଁ ଏଞ୍ଜାରି ନକିତା ଏନିକିଁ, ମା ନକିତା ଜିକେଏ ଏଲେକିହିଁ ଏ ନେହିଁ କାରୁ ଝେପୁକି ଆହାମାଚେ, ସାମା ଝେନାରି ନାମୁଚି ଝେଞ୍ଜାମାନି କାତା ଆହୁଆଲିଏ, ଏଦି ଏଞ୍ଜାରି ତାକି ଲାବା ଆଆତେ । ^୩ ଅଡ଼େ ମା ବିତ୍ରାଚି ଆମ୍ବାଆରି ନାମିନେରି, ଖାରଇ ଏଞ୍ଜାରି ମାହାପୁରୁ ଆଞ୍ଜାମାନି ଜ଼ିନି ଦେସାତା ହାଜାଲି ଆଡ଼ିନେରି, ଏନିକିଁ ଏଞ୍ଜାସି ଝେସାମାନେସି, “ଏଦାଆଁତାକି ନାନୁ ନା କପା ତାକି ପାରମାଣା କିଚେଏଁ,

ଏଞ୍ଜାରି ମା ଜ଼ିନି ଖାରାତା ହଡ଼ଅରି ।”

ଦାରତି ଗାଡ଼ିକିତି ବେଲାଚିଏ ବାରେ କାମା ରାହାମାଚେ । ^୪ ଇଚିହିଁ ଜ଼ିନି ଦିନାତି କାତାତି ଏଞ୍ଜାସି ର ଟାୟୁତା ଇଲେକିହିଁ ଝେସାମାନେସି; “ମାହାପୁରୁ ସାତା ଦିନାତା ତାନି ବାରେ କାମା ରାପୁହାନା ଜ଼ିଚେସି;” ^୫ ଅଡ଼େ ଇ ବାରେ କାତା ମାହାପୁରୁ ଝେଶ୍ଵେ ଏଲେଇଞ୍ଜା ମାନେସି, “ଏଞ୍ଜାରି ମା ଜ଼ିନି ତାଣା ହଡ଼ାଲି ଆଡ଼ଅରି ।” ^୬ ଆମିନି ଗାଟାରି ମୂଲୁଏ ନେହିଁ କାରୁ ଝେଞ୍ଜାମାଚେରି, ଏଞ୍ଜାରି ମାହାପୁରୁ କାତା ମାନଞ୍ଜି ଆଆତାକି ଏ ଜ଼ିନି* ତାଣା ହାଜାଲି ଆଡ଼ାଆଚେରି, ନୀଏଁ ଏ ଜ଼ିନିନାଣି† ଏଟକାତାରି ବେଟାଆହାମାନେରି

* ୪:୬ ୪:୭ ଆଞ୍ଜାମାନି ଦେସା କିଶାନ † ୪:୬ ୪:୭ ଆଞ୍ଜାମାନି ଦେସା କିଶାନ

।^୭ ଅଡ଼େ ର ଦିନା, ଇଚିହଁ “ନୀଞ୍ଜୁ ଦିନା” ଆଚାନା, ଇଚେକା କାଲ୍ଲା ତାୟୁ ଦାଞ୍ଜୁଦତି ସାଢ଼େସ୍ତରିତା ଏଲେଇଞ୍ଜି ମାନେସି, ଏନିକଁ ନକେଏ ଖେସ୍ପି ଆହାମାନେ,

“ନୀଞ୍ଜୁ ମୀରୁ ଏଞ୍ଜାଣି ହାଡ଼ା ଖେଞ୍ଜେରି,
ଜାହାରା ହିୟା ଆବ୍‌ଞ୍ଜା କିଆଦୁ ।”

୮ ଇଚିହଁ ଜିହସ୍ତୟ ଏଞ୍ଜାରାକି ଜମାଲି ହୀତିହଁମା, ଆତିହଁ ମାହାପୁରୁ ଅର ଜମିନି ଦିନାତି କାତା ଜଲ୍ଲାଆତେସିମା ।^୯ ଏଲେକିହଁ ଈ କାତା ସାତା ମାହାପୁରୁ ତାନି ବାରେ କାମାଟି ଜମିତି ଲେହେଁ ତାନି ଲକୁତାକି ଜମିନି ଦିନା ତୀରି କିଞ୍ଚିଆହାମାନେ ।^{୧୦} ଈଦାଆଁତାକି ମାହାପୁରୁ ତାନି କାମାଟି ଏନିକଁ ଜମିତେସି, ଆମ୍ବାଆସି ମାହାପୁରୁତି ଜମିନି ଦେସାତା ହଡ଼ା ମାନେସି, ଏଲେକିହଁ ଏ ଏଞ୍ଜାସି ଜିକେଏ ତାନି କାମାଟି ଜମିନାଣି ମେଡ଼ା ଆହାମାନେସି ।^{୧୧} ଈଦାଆଁତାକି ମା ବିତ୍ରାଟି ଆମ୍ବାଆସି ଏନିକଁ ନାମାଆତାକି ଏ ଲକୁତି ଲେହେଁ ଏ ଜମିନି ତାଣା ହଡ଼ାନା ଡ଼ୟଅସି, ଈଦାଆଁତାକି ଆଡ଼ିନି ପାତେକା ଜାଡ଼ନୁ ଆନ ।

^{୧୨} ଇଚିହଁ ମାହାପୁରୁତି ବଲୁ ଜୀଞ୍ଜୁଗାଟାୟି ଅଡ଼େ କାମା କିନାୟି ଇଞ୍ଜା ରିକଞ୍ଜାକି ଦାରାଗାଟି ଖାହୁନି କାଣ୍ଡା କିହାଁ ହାଡ଼େକା ଖାସ୍ତାୟି, ଅଡ଼େ ହିୟା ଅଡ଼େ ଜୀଞ୍ଜୁ ଇଞ୍ଜା ହାୟୁଲି ଅଡ଼େ ତୁମ୍‌କାତି ନିଜେଡ଼ି ପାତେକା ହଡ଼ାଲି ଆଡ଼ିନେ । ଏ ବଲୁ ମାଣ୍ଡସିତି ଡ଼ଗୁମାନି ଅଣ୍ଡପୁତି ବାରେ ନୀହାୟି କିନାୟି ।^{୧୩} ମାହାପୁରୁ ନକିତା ଏନାୟିଞ୍ଜା ତଞ୍ଜା ଆଆଗାଟାୟି ଆଏ, ସାମା ଗାଡ଼ି କିହାମାନି ମାହାପୁରୁ ନକିତା ମାଙ୍ଗେ ଲେକା ହୀନାୟି ମାନେ, ଏଞ୍ଜାଣି ନକିତା ବାରେ ଦେପି ଆଡ଼ାୟି ଅଡ଼େ ପୁକ୍‌ଆତାୟି ।

ଜୀସୁ କାଜା ପୂଜେରା

^{୧୪} ଏଦାଆଁତାକି ଲାକପୁରୁତି ହାଜାମାନେସି, ଆମ୍ବାଆସି ମାହାପୁରୁ ମୀର୍‌ଏସି ଜୀସୁ ଏଞ୍ଜାସି ମା କାଜା ପୂଜେରା ଆହାମାନାକି, ଖାଦୁ ମାର ମା ନାମୁତି ଜାଣ୍ଡେତଲେ ଆହନ ।^{୧୫} ଆମ୍ବାଆସି ମା ଦହ ପୁଞ୍ଜାଲି ଆଡ଼ିନେସି, ଏଲେତି କାଜା ପୂଜେରା ଏଞ୍ଜାସି ଆଏ । ସାମା ମା କାଜା ପୂଜେରା, ମା ଲେହେଁ ବାରେଞ୍ଜାକି ତାୟିପାରି ଆହାମାତେସି,

ଆତ୍ମଜିକେଏ ଏଞ୍ଜାସି ପାପୁ କିହାହିଲାଆତେସି ^{୧୭} ଏଦାଆଁତାକି
 ଖାଦୁ, କାର୍ମା ମେଡ଼ା ଆହାଲିତାକି ଅଡ଼େ, ଏ ବେଲାତେଏ ସାଢ଼େମି
 କିନାଣି କାର୍ମାମେହନାଣି ବେଟାଆହାଲି ତାକି ମାର ସାସାତଲେ
 କାର୍ମାମେହନି ସିଂଗାସାଣି ନକିତା ହାନ ।

୫

^୧ ଇଚିହ୍ମ ବାରେ କାଜା ପୂଜେରାଜା ଜାହାରା ଲକୁ ତାଣାଟି
 ଆଡ଼ି ଆନେରି, ଏଞ୍ଜାସି ଏଞ୍ଜାରି ଖାକିଟି ପାପୁ ମ୍ଲେକ୍‌ହାଲି ପୂଜା
 ଅଡ଼େ ଦାନା ହେରପାନା ମାହାପୁରୁତି ସେବା କିନେସି । ^୨ ଏଞ୍ଜାସି
 ବୁଦି ହିଲାଆ ଗାଟାରି ଅଡ଼େ ନାଡ଼ିକିଞ୍ଜି ଆହିମାନି ଲକୁଣି ଅର୍‌ହିନାଣି
 ତସାଲି ଆଡ଼ିନାସି, ଇଚିହ୍ମ ଏଞ୍ଜାସି ତାନୁଏ ଜିକେଏ ବାଡ଼ୁମ୍
 ହିଲାଆଗାଟାସି; ^୩ ଅଡ଼େ ଖାରୁଇ ଏଟକା ଲକୁଟି ପାପୁ ତାକି ଏଞ୍ଜାସି
 ପୂଜା କିହାଲି ଆନେ ଏଦି ଆଏ ସାମା ତାନି ପାପୁ ତାକି ଜିକେଏ
 ତାନୁ ପୂଜା କିହାଲି ଆନେ । ^୪ ଅଡ଼େ ଆମ୍ବାଆରି ଇ କାଜା ପୂଜେରା
 ପାଣାତି ତାମ୍ବାସୁ ଅହାକତାଲି ଆଡ଼ଅରି, ସାମା ହାରଣ ଏନିକ୍ ଆର୍‌ଞ୍ଜି
 ଆହାମାଚେସି, ଏଲେକିହ୍ମ ଏ ମାହାପୁରୁ ତାଣାଟି ଏଞ୍ଜାସି ଆଡ଼ି
 ଆନାୟି ମାନେ ।

^୫ ଏଲେକିହ୍ମ ଏ କ୍ରୀସ୍ତ ଜିକେଏ କାଜା ପୂଜେରା ପାଣାତି
 ଗାଞ୍ଜୁରମି ତାନୁଏ ପାରା ହିଲାଆତେସି, ସାମା ମାହାପୁରୁ ଏଞ୍ଜାଣାକି
 ଏ ଗାଞ୍ଜୁରମି ପାଣା ହାହାମାଚେସି, ଇଚିହ୍ମ ଏଞ୍ଜାସି ଏଞ୍ଜାଣାକି
 ଏଲେଇଞ୍ଜାମାଚେସି,

“ନୀନୁ ନା ମୀରଏଣାତି;

ନୀଞ୍ଜୁ ନାନୁ ନୀ ତାଞ୍ଜି ଆହାମାକି ।”

^୬ ଏଲେକିହ୍ମ ଏ ଅଡ଼େ ର ତାଣା ଜିକେଏ ଏଲେଇଞ୍ଜି ମାନେସି,

“ନୀନୁ ମଲକିସେଦକ ଲେହେଁ କାଟଲେଏଡି ପୂଜେରା ଆଦି ।”

^୭ ✨ଆମ୍ବାଆସି ଏଞ୍ଜାଣାକି ହାକିଟି ନୀର୍‌ହାଲି ଆଡ଼ିମାନେସି, ଏଞ୍ଜାସି
 ତାନି ଆଜା ତଲେ ନୀତା ମାଟାଟି, ମାହାପୁରୁ ନକିତା ହାରେକା
 ଡାହି ଡାହି ଅଡ଼େ କାଣ୍ଡୁତୁଲେ ପ୍ରାତାନା ଅଡ଼େ ବାଡ଼ିମାଲିହ୍ମ
 ହେରପା ମାଚେସି, ଇଞ୍ଜା ତାନୁଏ ଜାହାରାକି ଡ଼ାଣା କିହାକଡିନାସି

ଅଡ଼େ ତୀରିତାସି ମାତାକି ମାହାପୁରୁ ଏଞ୍ଜାଣି ରୀସ୍ତାଣି ଝେଚେସି, ଠି ଏଞ୍ଜାସି ମାହାପୁରୁ ମୀରୁଏସି ଆଡ଼ିଜିକେଏ ଦୁକୁତି ଅରୁହାନା ମାନୁଞ୍ଜି ଆହାଲି ଜାପିତେସି ।^୯ ଇଲେଆହୁଁ ତୀରିଆହାନା ତାନି ହୁକୁମି ମାନୁଞ୍ଜି ଆନାରାକି କାଲେଏ ଗେଲୁପିନାସି ଆନେସି;^{୧୦} ଏଦାଆଁତାକି ଏଞ୍ଜାସି ମାହାପୁରୁ ତାଣାଟି ମଲ୍ଲକିସେଦକତି ମେରାଲେହେଁ କାଜା ପୂଜେରା ଇଞ୍ଜି ଅଦିକାରା ବେଟା ଆଡ଼େସି ।

ନାମୁ ଉଣାଆନ୍ତି କାତା

^{୧୧} ଜୀସୁ କ୍ରୀସ୍ତତି କାତା ମାଜେ ହାରେକା ଝେହନାୟି ମାନେ, ସାମା ମିଜେ ତେଲୁହି କିୟାଲି ହାରେକା କସ୍ତ, ଇଚିହୁଁ ମୀ ଜୀସୁତା ଝେନାୟି ହାରେ ଉଣା ବାଡ଼ୁୟୁ ମାନେ ।^{୧୨} ଇଚିହୁଁ ଇଚର ଦିନା ବିତ୍ରା ମୀରୁ ଜାପୁନାତେରି ଆନାୟି ମାଚେ, ଆଡ଼ିଜିକେଏ ମାହାପୁରୁତି ବଲୁ ଏଟକା ଲକୁ ଜାପୁହାଲି ତାକି ମିଜେ ଲଡ଼ା ଆହିମାଞ୍ଜାନେ; ଝାଜିତି ରାନ୍ଦା ଲଡ଼ା କିଆନା ପାଲୁ ମିଜେତାକି ଲଡ଼ା ଆହିମାଞ୍ଜାନେ ।^{୧୩} ଆମ୍ବାଆସି ପାଲୁ ଗହନାସି ଏଞ୍ଜାସି ନେହାଁଣି ଲାଗେଏତି କାତା ପୁଞ୍ଜାଲି ଆଡ଼ଅସି, ଇଚିହୁଁ ଏଞ୍ଜାସି ଉଣା କକାସି ।^{୧୪} ସାମା ପାତାଆଡ଼ି ଲକୁ, ଇଚିହୁଁ ଆମ୍ବାଆରି ବୁଦିତଲେ ନେହାଁଣି ଲାଗେଏତାଣି ଆଡ଼ାଲି ଆଡ଼ିନେରି, ଏଞ୍ଜାରାକି ଝାଜିତି ରାନ୍ଦା ଲଡ଼ାମାନେ ।



^{୧୫} ଏଦାଆଁତାକି ଝାଦୁ ମାର କ୍ରୀସ୍ତତି ମୂଲୁଏ ଜାପିତି କାତା ପିସାନା, ତୀରିତଲେ ପାତାଆହାନା, ହାହାମାନି କାମାଟି ମନୁ ଝେଟୁହାନା, ମାହାପୁରୁ ତାଣା ନାମିନ,^{୧୬} ବାପ୍ତିସ୍ତତି* କାତା ଜାପୁନାୟି, ତାୟୁଁ ତୁ କେୟୁ ଇଚିନାଣି, ହାଡ଼ାରି ଝେଶ୍ଟେ ନିଜିନାୟି, କାଲେଏତି ଡଣ୍ଡୁତି ପୁନାଦି ଝେଶ୍ଟେ କିନାୟିମାନେ ।^{୧୭} ନୀଏଁ ମାର ନକିତା ହାନାୟିମାନେ, ହାଅ, ମାହାପୁରୁତି ହେଲ ଆଡ଼ିସାରେ ମାର ଇଦାଆଁ କିନ ।

^{୧୮} ଆମିନି ଗାଟାରି ନାମୁତି ଉଣା କିହାମାନେରି, ଏଞ୍ଜାରି ଅଶ୍ଵାମାନା ଝେଶ୍ଟା ଝାହାଲି ଆଡ଼ିନେରିକି ? ଏଞ୍ଜାରି ମାହାପୁରୁ ଉଜେଡ଼ିତା ବାସା କିହିମାଚେରି, ଲାକପୁରୁତି ଦାନାତି ଝାଣ୍ଡାନା, ସୁଦୁଜୀସୁତା

* ୭:୨ ୭:୨ମୁଞ୍ଜିନାୟି

ଆଶ୍ୱାମାଚେରି, ୫ ମାହାପୁରୁତି ନେହଁ ବଲୁ ଇଞ୍ଜା ଖାହିମାନି ଜୁଗୁତି ବାଡ଼ୁଡ଼ୁତି ଡାକନାଣି ଏଞ୍ଜାରି ଖାଶ୍ୱା ମାନେରି, ୬ ଏଞ୍ଜାରି ସାତାତି ପିସାନା ଲାଗେଏ ଆନେରି, ଆତିହଁ ମନତି ବାଦଲି କିଞ୍ଜିକିହାଲି ଅଡ଼େ ଖେଣ୍ଡେ ଏଞ୍ଜାରାଇଁ ପୁଃନି କିଞ୍ଜିକିହାଲି ଆଡ଼ାଆୟି, ଏଦାଆଁତାକି ଏଞ୍ଜାରି ତାନି ନାସା ଆହାଲିତାକି ମାହାପୁରୁ ମାରଏଣାଇଁ ପାସି ମୁଣ୍ଡାତା ଏକହାନା ଲକୁ ନକିତା ଏଞ୍ଜାଣାଇଁ ଲାଜା କିହିମାନେରି ।

୭ ଇତିହଁ ଆମିନି ବୁମି ପିୟୁ ରିନି ଏୟୁ ଗହନେ ଇଞ୍ଜା ଆମିନି ତାସା କିନାରାକି ଲଡ଼ା ଆନି ଆନି କାମ୍ବି କିନେ, ଏ ବୁମିତି ମାହାପୁରୁ ବର ହାନେସି । ୮ ସାମା ଏମ୍ବାଆଁ ହାପୁକା ଅଡ଼େ ଜାଡ଼ା ନେୟଁନେ, ଆତିହଁ ଏଡ଼ି ଏନି ଲାବା ଆଏ, ଏଡ଼ି ମାହାପୁରୁତି ବାକା ବେଟାଆନେ, ଅଡ଼େ ତାୟୁ ହିରୁତା ଡ଼ାଞ୍ଜାହାନେ ।

୯ ସାମା ଏ ଜୀଞ୍ଜୁତି ତାୟିୟାଁ, ମାମ୍ବୁଇଲେକଁ କାତା ଖେସ୍ତି ଜିକେଏ ମୀ ତାଣା ମା ହାରେକା ନାମୁ ମାନେ; ମୀରୁ ଗେଲୁପିଆହାଲି ମାହାପୁରୁତି ବର ବେଟାଆହାମାଞ୍ଜେରି । ୧୦ ଇତିହଁ ମାହାପୁରୁ ମୀ କାମା, ଅଡ଼େ ମାହାପୁରୁ ଲକୁଣି ସେବା କିହିମାନାଣି ଅଡ଼େ ନୀଏଁ ଜିକେଏ କିହିମାନାଣି ଅଡ଼େ ତାନି ଦରୁ ତାକି ମୀରୁ ଆମିନି ଜୀଞ୍ଜୁନହଁ ମାଞ୍ଜେରି, ଏଦାଆଁ ମାହାପୁରୁ ବାଣ୍ଡି ଆନେସି ଇଲେତି ଦାମ୍ବୁ ହିଲାଆଗାଟାସି ଏଞ୍ଜାସି ଆଏ । ୧୧ ସାମା ମାଡ଼ି ରଣ୍ଡିଏ ଅଣ୍ଡୁ, ମୀରୁ ତାୟୁ ପାତେକା ମାଞ୍ଜେତାକି ମୀ ଜୀଞ୍ଜୁନନାୟି କାଲେଏ ଡ଼ୟାପେ ଆତିହଁ ମୀ ବାରେ ଆସା ପୁରା ଆନେ । ୧୨ ଏନିକଁ ମୀରୁ ନିସ୍ତା ଆଆନା ଆମ୍ବାଆରି ନାମୁ ଅଡ଼େ ସାସାତଲେ ଆଞ୍ଜାମାନାଣି ଅଦିକାରା କିହିମାନେରି ଏଞ୍ଜାରିଲେହେଁ ଆଦୁ ।

ମାହାପୁରୁତି ଆଞ୍ଜିନାୟି ସାତା ଆନେ

୧୩ ଇତିହଁ ମାହାପୁରୁ ଏଚିବେଲା ଅବାହାମଇଁ ଆଞ୍ଜାମାଚେସି, ଏଚିବେଲା ଏଞ୍ଜାସି ତାନି ଆଞ୍ଜାମାନାଣି ମାନୁଞ୍ଜି ଆହାଲି ପାରମାଣା କିହାମାଚେସି, ଏଞ୍ଜାଣି କିହାଁ ଆମ୍ବାଆସି କାଜାସି ହିଲାଆକି ଏଞ୍ଜାସି ତାନି ଦରୁତଲେ ପାରମାଣା କିହାଁ ଏଲେଇଞ୍ଜାମାଚେସି, ୧୪ ଏଞ୍ଜାସି ଏଲେଇଚେସି, “ନାନୁ ନିଞ୍ଜେ ସାତେଏ ବର ହିୟାଇଁ ଅଡ଼େ ନୀ କୁଡ଼ାତି ହାରେକା ପାଡ଼ିକିଇଁ ।” ୧୫ ଅଡ଼େ ଇଲାଆହଁ ହାରେକା ଅରହାନା

ଅବ୍ରାହାମ ଆଞ୍ଜାମାନାଣି କାତାମାଚାକି ଏଦାଆଁ ନେଡ଼ା ଆହାମାଚେସି । ୧୭ ମାଣ୍ଠିୟାଁ ଏଞ୍ଜାରି କିହାଁ କାଜା ଦରୁତଲେ ପାରମାଣା କିନେରି, ଅଡ଼େ କାତା ତାରି କିହାଲି ଏଞ୍ଜାରି ବାରେ ଗଡ଼ହା ପାରମାଣା ତଲେ ତାରି ଆନେ । ୧୮ ମାହାପୁରୁ ଆମ୍ବାଆରାଇଁ ଇ ବାରେ ହାଲ୍ ଇଞ୍ଜା ଆଞ୍ଜାମାଚେସି, ଏ ଆଞ୍ଜାମାନାଣି ମାନୁଞ୍ଜି ଆହାଲି ତାନି ଆଞ୍ଜାମାନାଣି ତାକି ପାରମାଣା କିହାମାଚେସି । ୧୯ ଏନିକ୍ ଆମିନି ରୀ ବାଦଲି ଆଆଗାଟି କାତାତି ମାହାପୁରୁ ମିତି ଖେସାଲି ଆଡ଼ଅସି, ଏଦାଣି ତଲେ ନକିତି ବାସୁତି ଆସାଲି ତାକି ବାସା ଟାମୁତା ମାର ହଟି ମାନାୟି, ଇଞ୍ଜା ମାର ବାଡ଼ମୁତି ରାହାଁ ବେଟାଆନାୟି । ୧୯ ଏୟୁ ଜାଜା ଦହନି ଲହ ମୁଣ୍ଡାଲେହେଁ, ଏ ବାସୁ ମା ଜୀଞ୍ଜୁତି ଗେଲ୍ପି କିନାୟି ଅଡ଼େ ଆଞ୍ଜିନାୟି, ଏଦି ମାହାପୁରୁ ଇଲୁତି ଏଟକା କିନି ହିମ୍ବରି ଲେଟାମାନି ଟାମୁତା ହଡ଼ାନା ଆଡ଼ଞ୍ଜା ଅଡ଼େ ତାରି ଆହାମାନେ, ୨୦ ଅଡ଼େ, ଜୀସୁ ଏ ଟାମୁତା ମଲକିସେଦକ ଲେହେଁ କାଲ୍ଲାକାଲ୍ଲାତି କାଜା ପୂଜେରା ଆହାମା ମା ନକିତା ତାକିନି ଲେହେଁ ହଡ଼ାମାନେସି ।



ମଲକିସେଦକତି ପୂଜେରା ପାଣା

୧ ଇ ମଲକିସେଦକ ସାଲେମ ଦେସାତି ରାଜା ଅଡ଼େ ବାରେକିହାଁ କାଜା ମାହାପୁରୁତି ପୂଜେରା ମାଚେସି । ଅବ୍ରାହାମ ଅଡ଼େ ତାନି ତଡ଼ଦୁରି, ସାରି ଜାଣା ରାଜାୟାଁ ତଲେ ଜୁଜୁତା ଜୀଣା ଆହାଁ ଖେଣ୍ଡେ ଖାହିମାଟି ବେଲାତା ମଲକିସେଦକ ଅବ୍ରାହାମଇଁ ବେଟାଆହାନା ବର ହୀତେସି; ୨ ଅବ୍ରାହାମ ଜିକେଏ ଏଞ୍ଜାଣାକି ଜୁଜୁତା ଜୀଣାଆହାମାଟି ଆସ୍ତିଟି ଦସ ବାଗାତି ର ବାଗା ହୀହାମାଚେସି । ମଲକିସେଦକ, ଇଚିହଁ “ଦାମୁତି ରାଜା” ଅଡ଼େ ସାଲେମତି ରାଜା, ଇଚିହଁ “ହିଡ଼ଡ଼ିତି ରାଜା ।” ୩ ଏଞ୍ଜାଣି ତାଲି ତାଞ୍ଜି ଆକୁ ଆବାୟାଁ ଦରକା କି ଏଞ୍ଜାଣି ଜାର୍ନା ଦିନା କି ଜୀଞ୍ଜୁତି ରାଡ଼ି ଦିନା ଆମ୍ବିୟାଞ୍ଜା ରାସ୍ତକି ଆହାହିଲେଏ; ଏଞ୍ଜାସି ମାହାପୁରୁ ମୀରଏସି ଲେହେଁ କାଲ୍ଲା କାଲ୍ଲାକି ପୂଜେରା ଆହାମାଚେସି ।

୪ ଅଣପାରି କିଦୁ, ମଲକିସେଦକ ଏଚେକା କାଜାସି ମାଚେସି, ଆକୁ ଅବ୍ରାହାମ ଜୁଜୁତା ଜୀଣାଆହାନା ତାତାମାଟି ଆସ୍ତିଟି ହାରେକା

ନେହୁଁ ଆସ୍ତିତି ଦସ ବାଗାତି ର ବାଗା ଏଞ୍ଜାଣାକି ହୀହାମାଚେସି । ୫ ଲେବି କୁଡ଼ାତି ମୀରକା ବିତ୍ରାତି ଆମିନି ଗାଟାରି ପୂଜେରା ପାଣା ବେଟାଆନ୍ତେରି, ଏଞ୍ଜାରି ମସାତି ମେରାଲେହେଁ ଇସ୍ତାୟେଲ ଲକୁ ତାଣାଟି ଇଚିହୁଁ ତାମି ତାୟିୟାଁ ତାଣାଟି ଦସ ବାଗାଟି ର ବାଗା ବେଟାଆହାଲି ହେଲ ବେଟା ଆହାମାନେରି, ଏଞ୍ଜାରି ଅବ୍ରାହାମ ଆଙ୍ଗାଟି ଜାର୍ନା ଆଡ଼ିଜିକେଏ ତାମି ଲକୁ ତାଣାଟି ଦସ ବାଗାଟି ର ବାଗା ଅନ୍ତେରି; ୬ ମଲ୍କିସେଦକ ଲେବି କୁଡ଼ାତାସି ଆଏ, ଆଆତି ଜିକେଏ ଏଞ୍ଜାସି ଅବ୍ରାହାମ ତାଣାଟି ଦସ ବାଗାଟି ର ବାଗା ଅଡେସି, ଇଞ୍ଜା ମାହାପୁରୁ ଆଞ୍ଜାମାନାଣି ବେଟାଆନାକି ବର ହୀତେସି । ୭ ବର ହୀନାସି ବର ବେଟାଆନାଣି କିହାଁ କାଜାସି, ବାରେଜାଣା ଇଦାଆଁ ପୁଞ୍ଜାମାଞ୍ଜେରି । ୮ ଇଲେକିହୁଁ ହାନ୍ତି ମାଣସିୟାଁ ଦସ ବାଗାଟି ର ବାଗା ଅହିମାନେରି ଏଞ୍ଜାରି ଜିକେଏ ର ଦିନା ହାନେରି, ସାମା ଏଚିବେଲାତା ଆମ୍ବାଆସି ଅବ୍ରାହାମତି ଦସ ବାଗାଟି ର ବାଗା ଅହାମାଚେସି ଏଞ୍ଜାଣି କାତା ସାକି ହୀପୁକି ଆହିମାନେ, ଏଞ୍ଜାସି ହାହା ହିଲଅସି । ୯ ମାର ଏଲେଇଞ୍ଜାଲି ଆଡ଼ିନାୟି, ଦସ ବାଗାଟି ର ବାଗା ଅହିମାନି ଲେବି ତାନୁ ଜିକେଏ ଅବ୍ରାହାମ ତାଣାଟି ଦସ ବାଗାଟି ର ବାଗା ହୀହାମାନେସି । ୧୦ ଏନାଆଁତାକି ଇଚିହୁଁ ଅବ୍ରାହାମଇଁ ମଲ୍କିସେଦକ ଆଣ୍ଡିତାଟି ଲେବି ଏଚିବେଲାତା ଜାର୍ନା ଆହା ହିଲାଆତେସି ସାମା ଲେବି ଏଞ୍ଜାଣି ଆଙ୍ଗା ବିତ୍ରା ମାଚେସି ।

୧୧ ଇ ଲେବିୟ ଲକୁତି ପୂଜେରା ପାଣା ତଲେ ଇସ୍ତାୟେଲ କୁଡ଼ାତି ଲକୁ ତାକି ମସାତି ମେରା ହୀପୁକି ଆହାମାଚେ । ଅଡେ ଲେବି ଲକୁତି କାମା ନେହୁଁ କିହାଲି ଆଡ଼ିତିହୁଁମା, ହାରଣତି ଅଦିକାରାଗାଟି ଇ ଲେବି ପୂଜେରାଙ୍ଗା ପିସାନା ମଲ୍କିସେଦକ ଅଦିକାରା ଲେହେଁ ଅର କୁଡ଼ାତି ପୂଜେରା ଲଡ଼ା ହିଲାଆତେ । ୧୨ ଇଚିହୁଁ ପୂଜେରା ପାଣା ବାଦଲି ଆନେ, ଆତିହୁଁ ମସା ମେରା ଜିକେଏ ବାଦଲି ଆନାୟି ମାନେ । ୧୩ ଇଚିହୁଁ ଆମ୍ବାଆରି ତାକି ଇ ବାରେ ଝେସ୍ପି ଆହାମାନେ, ଏଞ୍ଜାସି ଅର କୁଡ଼ାତି ଲକୁ ମାଚେସି, ଆମିନି କୁଡ଼ାତାରି ଆମ୍ବାଆସି ଏଚେଲାଞ୍ଜା ପୂଜା ପିଣ୍ଡାତି ସେବା କାମା କିହାଲି ଆଣ୍ଡାହିଲଅସି । ୧୪ ଇଚିହୁଁ ଇଦି ସାତା ମା ପ୍ରୁ ଜୀହୁଦା କୁଡ଼ାଟି ଜାର୍ନା ଆହାମାନେସି ଇଞ୍ଜା ମସା ଇ କୁଡ଼ାତି ପୂଜେରା ପାଣା ତାକି ଏନାଆଁ ଝେସାହିଲଅସି ।

ମଲ୍ଲକିସେଦକ ଲେହେଁ ଅଡ଼େ ର ପୂଜେରା

୧୫ ଅଡ଼େ ଇଦି ଇମ୍ପାଟି ଜିକେଏ ନେହଁକଁ ପୁନାୟି, ମଲ୍ଲକିସେଦକ ଲେହେଁ ଅଡ଼େ ର ପୂଜେରା ହରାମାନେସି । ୧୬ ଏଞ୍ଜାସି ଆଜ୍ଞା ତଲେତି ମସା ମେରାଟି ପୂଜେରା ଆହାହିଲଅସି ସାମା ରାଆଗାଟି ଜୀଞ୍ଜୁତି ବାଡ଼ୁରୁଟି ପୂଜେରା ପାଣା ମେଡ଼ା ଆହାମାନେସି । ୧୭ ଇଚିହଁ ଦାମ୍ପୁପତିତା ଏଞ୍ଜାଣି ତାକି ଇଲେକଁ ଦାମ୍ପୁ ସାସ୍ତେରିତା ସାକି ହୀପକି ଆହାମାନେ; “ନୀନୁ ମଲ୍ଲକିସେଦକ ଲେହେଁ କାଲାକାଲାତି ପୂଜେରା ଆଦି ।” ୧୮ ଇମ୍ପାଆଁ ତଲିତି ହୁକୁମି ବାଡ଼ୁରୁ ହିଲଆଗାଟାୟି, ଉଜେଏତାୟି ଲାକା ଏଦି ମେଣ୍ଡାଜ୍ଞା ହାଜାମାନେ । ୧୯ ଏନାଆଁତାକି ଇଚିହଁ ମସାତି ମେରା ଏନାଆଁଞ୍ଜା ତୀରି କିହାଲି ଆଡ଼ାଆତେ । ଅରଞ୍ଜାକି ବାରେକିହାଁ ହାରେକା ନେହଁ ବାସ୍ତୁ ହରାମାନେ, ଏ ବାସ୍ତୁଟି ମାର ମାହାପୁରୁ ତାଗେ ହାଜାଲି ଆଡ଼ିନାୟି ।

୨୦ ମା ତାକି ମାହାପୁରୁଟି ପାରମାଣା ହାରେକା ମାନେ । ହାରଣ କୃତାତି ପୂଜେରା ପାଣାତା ଆର୍ଞ୍ଜି ଆଡ଼ାଟି ଇଲେତି ଏନି ପାରମାଣା ହୀପକି ଆହାହିଲଆତେ । ୨୧ ସାମା କ୍ରୀସୁ ପୂଜେରା ଆଦି ବେଲାତା ମାହାପୁରୁ ପାରମାଣା କିହାନା ଏଞ୍ଜାଣାଇଁ ଏଲେଇଞ୍ଜାମାରେସି,

“ପ୍ରବୁ ର ପାରମାଣା କିହାମାନେସି,
ଏଞ୍ଜାସି ତାନି ଅଣ୍ଡୁପୁତି ବାଦ୍ଲି କିଅସି,

ନୀନୁ କାଲାକାଲାତି ପୂଜେରା ଆଦି ।”

୨୨ ପ୍ରବୁ ଇଲେକଁ ପାରମାଣା କିହାମାନାକି ଜୀସୁ ଅଡ଼େ ର ହାରେକା ନେହଁ ରାଜିମାନା କିନାସି ଆହାମାନେସି ।

୨୩ ପୁଞ୍ଜଇ ତାଣା ଜିକେଏ ଏଟ୍‌କା ପୂଜେରାଜ୍ଞା ହାନାରି ଆହାମାନାକି ଏଞ୍ଜାରି ହାଡ଼ି ତାୟୁ ଏଟ୍‌କାତାରି ପୂଜେରା ପାଣା ବେଟାଆନ୍ଦେରି ଏଦାଆଁତାକି ଏଞ୍ଜାରି ହାରେକା । ୨୪ ସାମା ଜୀସୁ କାଲାକାଲା ନୀତାମାନାକି, ଏଚେଲାଞ୍ଜା ବାଦ୍ଲି ଆଆ ପୂଜେରା ପାଣା ବେଟାଆହାମାନେସି । ୨୫ ଏଦାଆଁତାକି ଏଞ୍ଜାଣି ତାଣାଟି ଆମିନି ଗାଗାରି ମାହାପୁରୁ ତାଗେ ହାନେରି, ଏଞ୍ଜାରାକି ଏଞ୍ଜାସି ହାରେପୁରେ ନୀଏଁ ଅଡ଼େ କାଲେଏ ଗେଲ୍‌ପାଲି ଆଡ଼ିମାନେସି, ଏନାଆଁତାକି

ଇତିହାସ ଏଞ୍ଜରୀ ତାକି ମାହାପୁରୁ ତାଣା ଗହାରା କିହାଲି ଏଞ୍ଜାସି କାଲେଏ ନୀଡ଼ାମାନେସି ।

୨୭ ଏନାଆଁତାକି ଇତିହାସ ଇଲେତି କାଜା ପୂଜେରା ମା ତାକି ନେହାସି, ଆମ୍ବାଆସି ସୁଦୁଗାଟାସି, ଦହ ହିଲ୍ଲାଆଗାଟାସି, ଲାଗେଏତି ସିନା ହିଲ୍ଲାଆଗାଟାସି ପାପୁ ଗାଟାରି ତାଣାଟି ଏଟ୍‌କା ଆହାମାନାସି, ଲାକପୁରୁ ଅଞ୍ଜିଆଡେସି । ୨୭ ଏ କାଜା ପୂଜେରା ଲେହେଁ ବାରେଦିନା ନକେଏ ତାନି ପାପୁ ତାକି ଅଡେଡ଼େ ଡାୟୁ ଲକ୍ଷୁତାକି ବାରେଦିନା ପୂଜା ହୀହାଲି ଲଡ଼ା ହିଲେଏ, ଇତିହାସ ତାଙ୍ଗେ ପୂଜା ହୀତାକି ଏଞ୍ଜାସି ରଣ୍ଡିଏ ପାଲି ଇଦାଆଁ କିହାମାନେସି । ୨୮ ଏନାଆଁତାକି ଇତିହାସ ମସାତି ଦେରା ବାଡ଼ୁୟୁ ହିଲ୍ଲାଆଗାଟି ମାଣ୍ଡସିଇଁ କାଜା ପୂଜେରା ପାଣାତା ଆଡ଼ିନେ, ସାମା ଆମିନି ପାର୍‌ମାଣାତି ବଲୁ ମସାତି ଦେରା ଜେତ ଆହାମାଟେ, ଏଡ଼ି କାଲ୍ଲାକାଲ୍ଲା ତାକି ତୀରିଗାଟି ମୀରଏଣାଇଁ ଆଡ଼ିମାନେ ।

୮

ଜୀସୁ ମା କାଜା ପୂଜେରା

୧ ମାମ୍ବୁ ଏନାଆଁ ଝେସିମାଞ୍ଜାନମି ଏମ୍ବାତି କାଜା କାତା ଇଦି, ମାଙ୍ଗେତାକି ଇଲେତି ର କାଜା ପୂଜେରା ମାନେସି, ଏଞ୍ଜାସି ଲାକପୁରୁ କାଜା ଗାଞ୍ଜୁରମିଗାଟି ମାହାପୁରୁ ସିଂଗାସାଣିତି ଚିଃନି ଚଟତା କୁଗାମାନେସି । ୨ ଏଞ୍ଜାସି ବାରେତି କିହାଁ ସୁଦୁ ଗାୟୁତା ଇଞ୍ଜା ଆମିନି ସାତା ତୁମ୍ବୁ ଇଲ୍ଲୁ ମାଣ୍ଡସି କେୟୁଟି କେପି ଆଆନା ପ୍ରବୁ ତାଣାଟି ତୀରି ଆହାମାନେ ଏମ୍ବାତି ସେବା କାମା କିନେସି ।

୩ ଇତିହାସ ବାରେ କାଜା ପୂଜେରାଙ୍ଗା ଦାନା ଅଡେଡ଼େ ଜନ୍ତୁତି ଡାକାହାଁ ପୂଜା କିହାଲି ଆର୍‌ଞ୍ଜି ଆହାମାନେରି, ଇଦାଆଁତାକି ଇ କାଜା ପୂଜେରାକି ଜିକେଏ ପୂଜା ହେରପାଲି ତାକି ଲଡ଼ାମାନେ । ୪ ଜୀସୁ କ୍ରୀସ୍ତ ଦାର୍‌ତିତା ମାଟିହାଁମା, ପୂଜେରା ଜିକେଏ ଆୟାଲି ଆଡ଼ାଆଡେସିମା, ଏନାଆଁତାକି ଇତିହାସ ଜୀହୁଦି ଲକ୍ଷୁତି ଦେରା ଲେହେଁ ଦାନା ହେରପିନେରି ଇଲେତି ପୂଜେରାଙ୍ଗା ଏମ୍ବାଆଁ ମାନେରି; ୫ ପୂଜେରାଙ୍ଗା ଆମ୍ବାଆରି ସେବା କିନେରି, ଏଡ଼ି ଲାକପୁରୁତି କାତା ପୁଣ୍ଡିକିନିଲେହେଁ ସାୟୁଁ ସମାନା, ମସା ଏଚିବେଲ୍ଲା ପୂଜା

କିହାଲିତାକି ର ତୁମ୍ଭ କେପିନି ବେଲାତା ଏଞ୍ଜାଣାକ୍ ମାହାପୁରୁ
 ଏଲେଇଞ୍ଜାମାଚେସି, “ଜାଗ୍ରାତା, ହରୁତା ନିଜେ ଆମିନି ହୁକୁମି ତସ୍‌ପି
 ଆହାମାଞ୍ଜାତେ, ଏଲେକିହିଁଏ ବାରେ କେପାମୁ ।” ୬ ସାମା ନୀର୍ବ
 ଜୀସୁକି ଆମିନି ପୂଜେରା କାମା ହୀପ୍‌କି ଆହାମାନେ, ଏଦି ଏଟ୍‌କାତି
 ପୂଜେରାକ୍‌ମା କାମା କିହ୍‌ନା କାଜାୟି । ଏଲେକିହିଁଏ ମାହାପୁରୁ ଅଡ଼େ
 ମାଣ୍‌ସିୟାଁ ମାଦି ଏଞ୍ଜାସି ଆମିନି ରାଜିମାନା କିହାମାନେସି ଏଦି
 କାଜାୟି, ଇଚିହିଁ ଇ ମେରାତା ହାରେକା କାଜା କାତା ହୀହାଲି
 ଆଞ୍ଜାମାନାୟି ମାନେ ।

୭ ଇଚିହିଁ ତଲିତି ରାଜିମାନା ଏନି ଦହ୍ ହିଲାଆତିହିଁମା, ତାୟୁ
 ଅଡ଼େ ଅର ରାଜିମାନା ଲଡ଼ା ଆଆଡେମା । ୮ ସାମା ମାହାପୁରୁ ତାନି
 ଲକୁଇଁ ଦହ୍ ଦସାନା ଏଞ୍ଜାରାଇଁ ଏଲେଇଞ୍ଜି ମାନେସି,

“ପ୍ରବୁ ଏଲେଇଞ୍ଜି ମାନେସି, ମେହ୍‌ଦୁ ର ଦିନା ଖାହିମାନେ,

ଏରିବେଲା ନାନୁ ଇସ୍ରାୟେଲ କୃଡ଼ା ଅଡ଼େ ଜୀହୁଦା କୃଡ଼ା ତଲେ
 ର ପୁଃନି ରାଜିମାନା ତୀରି କିଇଁ;

୯ ଆମିନି କାଲ୍‌ତା ନାନୁ ଏଞ୍ଜାରି ଆକୁୟାଣି କେସ୍‌ମା ଆସାନା ମିସର
 ଦେସାଟି ହପୁହା ତାଚାମାଚେସି,

ଏ ବେଲାତା ଏଞ୍ଜାରିତଲେ ନାନୁ ଆମିନି ରାଜିମାନା
 କିହାମାଚେସି, ଇ ରାଜିମାନା ଏଲେକିହିଁ ଆଏ;

ଇଞ୍ଜା ଏଞ୍ଜାରି ନା ରାଜିମାନାତା ତୀରି ଆହିଁ ମାନାଆଡେରି,

ଇଞ୍ଜା ନାନୁ ଏଞ୍ଜାରାଇଁ ମନ ହୀଆଡେସି, ପ୍ରବୁ ଇ କାତା ଏଲେ
 ଇଞ୍ଜିମାନେସି ।

୧୦ ପ୍ରବୁ ଏଲେଇଞ୍ଜି ମାନେସି,

ତାୟୁ ନାନୁ ଇସ୍ରାୟେଲ କୃଡ଼ା ତଲେ ଇ ରାଜିମାନା କିଇଁ, ଏଦି
 ଇଦି,

ନାନୁ ଏଞ୍ଜାରି ମନତା ନା ମେରା ହୀଇଁ,

ଏଞ୍ଜାରି ହିୟାତା ଏ ବାରେ ରାଡ଼ିଇଁ,

ଅଡ଼େ ଏଞ୍ଜାରି ମାହାପୁରୁ ନାନୁ ଆଇଁ,

ଅଡ଼େ ଏଞ୍ଜାରି ନା ଲକୁ ଆନେରି ।

୧୧ ମାହାପୁରୁଇଁ ପୁଞ୍ଜୁ ଇଞ୍ଜିଁ ଏଞ୍ଜାରି ବିତ୍ରାଟି ରଅସିଞ୍ଜା ତାମି କୃଡ଼ାତି
 ଗାଡ଼ାତାରାଇଁ ଖେହ୍‌ଅସି,

ଇଞ୍ଜା ତାମି ତାୟିୟାଁଇଁ କି ପାଡ଼ିତାରାଇଁ ଜାପୁଅରି,
ଏନାଆଁତାକି ଇଚିହୁଁ ଉଣାଟିଏ କାଜାରି ପାତେକା ଏଞ୍ଜାରି
ବାରେଜାଣା ନାଙ୍ଗେ ପୁଞ୍ଜାମାନେରି ।

୧୨ ନାନୁ କାର୍ନାମେସାନା ଏଞ୍ଜାରି ବାରେ ପାପୁ ମ୍ବେକ୍‌ଇଁ,
ଅଡ଼େ ଏଞ୍ଜାରି ଲାଗେଏ କିନାଣି ଏରେଲାଞ୍ଜା ଅଣପଅଁ ।”

୧୩ ମାହାପୁରୁ ର ପୁଞ୍ଜି ରାଜିମାନା କିତାକି ତଲିତି ରାଜିମାନାଇଁ
ପୁଞ୍ଜି ରାଜିମାନା କିହାମାନେସି; ଇଞ୍ଜା ଅଡ଼େ ଆମିନି ପୁଞ୍ଜିଆୟି ଲଡ଼ା
ହାଆଗାଟାୟି ଆହାମାନେ, ଏଡ଼ି ଗାଡ଼େକେଏ ମେଣ୍‌ଜିନେ ।



ଦାର୍ତ୍ତି ଅଡ଼େ ଲାକପୁରୁତି ପ୍ରାଡାନା

୧ ସାତେଏ ଏ ତଲିତି ରାଜିମାନା ଜିକେଏ ପ୍ରାଡାନା କିନି ମେରା
ଅଡ଼େ ର ଦାର୍ତ୍ତିତି ସୁଦୁ ଟାୟୁ କିଞ୍ଜି ଆହାମାରେ ।^୨ ଏଡ଼ି ର ତୁମୁ ତଲେ
କେପିତି ଇଲୁ ଆହାମାରେ, ଏମ୍ବାତି ତଲିତି ବାକ୍ରା ଇଞ୍ଜାଁ ଇନେରି
ଏମ୍ବାଆଁ ର ଦୀଞ୍ଜି ସଡ଼ା, ର ପିଣ୍ଡା ଅଡ଼େ ମାହାପୁରୁକି ହେରପାମାନି ରୁଟି
ମାରେ, ଏଦାନି ସୁଦୁ ଟାୟୁ ଇନେରି ।^୩ ଏମ୍ବାଆଁ ଲେଟାମାଟି ଟାଟିନି
ରା ହିମ୍ବରିକା ଡାୟୁଞ୍ଜାକି ଆମିନି ତୁମୁ ମାରେ, ଏଦାଆଁ ହାରେକା ସୁଦୁ
ବାକ୍ରା ଇଞ୍ଜାଁ ଇନେରି; ^୪ ଏମ୍ବାଆଁ ବାଂଗାରା ତଲେ ଖାରି କିହାମାଟି
ଦୁପ୍‌ଣି ହୁଡିନି ର ପିଣ୍ଡା ଅଡ଼େ ବାଂଗାରା ତଲେ ଖାରି କିହାମାଟି
ରାଜିମାନା ପେଡ଼ା ମାରେ । ଏ ରାଜିମାନା ପେଡ଼ାତା ମାନା ଇଚିକି
ଆହାମାଟି ର ବାଂଗାରା ମୁତା ଅଡ଼େ ହାରଣାୟି ଆକୁ ଗାଲୁହାମାଟି
ବାଡ଼ଗା ଇଞ୍ଜାଁ ରାଜିମାନା ରାସ୍‌କି ଆହାମାଟି ରିଣ୍ଡି ଖାଲି ପାଟାୟାଁ
ମାରୁ, ^୫ ରାଜିମାନା ପେଡ଼ା ଲାକ ମାହାପୁରୁ ନକିତା ନିଟାମାନି ଲେହେଁ
ଗାଞ୍ଜୁରମିଗାଟି ଜଡ଼େକା କିରୁବ ଦୂତୁୟାଁତି ବମା ମାରୁ, ଏଞ୍ଜି ପାପୁ
ମେଣ୍‌ଜି କିନି ଟାୟୁତି ପ୍ବିକହାମାରୁ; ଏଞ୍ଜି ପାପୁ ମ୍ବେକ୍‌ନି ଟାୟୁ ଲାକ
ମାରାୟାଁ ପ୍ବିକହାମାରୁ, ଏ ବାରେତି କାତା ନୀଏଁ ନେହୁଁ କିଁ ଖେସାଲି
ଲଡ଼ା ହିଲେଏ ।

^୨ ଏମ୍ବାଆଁ ଇଲେତି ମେରା ମାନେ; ପୂଜେରାଙ୍ଗା ଦିନାତାକି ଦିନା
ତୁମୁତି ତଲିତି ବାକ୍ରା ବିଡ଼ା ତାମି ସେବା କାମା କିନେରି, ^୩ ସାମା
ଡାୟୁତି ବିଡ଼ା ବାକ୍ରାତା ଖାରଇ କାଜା ପୂଜେରା ବାର୍ଯା ତାକି ରଣିଏ

ଦେବା ହତ୍ତନେସି, ତାନି ପାପୁ ଇଞ୍ଜା ଲକ୍ଷୁତି ପୁନାଆତି ପାପୁ ତାକି ମାହାପୁରୁକି ପୂଜା ହେରପାଲି ଏଞ୍ଜାସି ନେତେରି ଅହାନା ହାରେକା ସୁଦୁ ଟାୟୁତା ହତ୍ତନେସି । ୮ ଇଦାଆଁତାକି ସୁଦୁଜୀଞ୍ଜୁ ମାଞ୍ଜେ ଜାପୁହି ମାଞ୍ଜାନେ, ନକିତି ସୁଦୁ ତୁମୁ ମାନି ପାତେକା ହାରେକା ସୁଦୁ ଟାୟୁତା ହତ୍ତାଲି ଜିରୁ ତଞ୍ଜାଆହାଁ ହିଲେଏ । ୯ ଇ ତଲିତି ବାକ୍ରା ନୀର୍ବ କାଲ୍ଲା ତାକି ପୁଣ୍ଡି କିଞ୍ଜିକିନି ସିନା, ଅଡେ ଏଲେକିହି ଏ ଦାନା ଅଡେ ପୂଜା ଇ ବାରେ ହୀପକିଆନେ, ସାମା ଇ ବାରେ ସେବା କିନାରାଇଁ ନେହି ଅଣ୍ପୁତି ଦାନା ହୀହାଲି ଆଡେଏ; ୧୦ ଇତିହି ଏ ବାରେ ଖାରଇ ତିନାଣି ଉନାଣି ଅଡେ ଅଡହାଲି ତାକି ଆଙ୍ଗା ତାକି କିନି କାମାୟାଁ ସାମା ମାହାପୁରୁତି ପୁଞ୍ଜି ମେରା ଆନି ପାତେକା ଇଦି ବାରେ ଲଡ଼ାଗାଟାୟି ଆହାମାଟେ ।

୧୧ ସାମା କ୍ରୀସ୍ତ ନୀର୍ବ ନେହି କାମାତି କାଜା ପୂଜେରା ସମାନା ଆହାନା ଖାହାମାନେସି, ଇଞ୍ଜା ଏମିନି ତୁମୁ ଇଲୁତା ଏଞ୍ଜାସି ତାନି ସେବା କାମା କିହାମାନେସି, ଇ ଇଲୁ ଦାରତିତା ମାନି ତୁମୁ ଇଲୁ କିହାଁ ହାରେକା କାଜାୟି ଅଡେ ନେହାୟି, ଏଦି ମାଣ୍ଡସି କେୟୁତଲେ କେପାଆତି ତୁମୁ ଇଲୁ, ଏଦି ତଞ୍ଜାଆହାମାନି ଦାରତି ବିତ୍ରା ହିଲାଆତେ । ୧୨ କ୍ରୀସ୍ତ ଗରି କି ବାଟା କଡ଼ିତି ନେତେରି ତଲେ ଆଏ, ସାମା ଜାହାରା ନେତେରି ତଲେ ରଣ୍ଡିଏ ଦେବା ସୁଦୁ ଟାୟୁତା ହତ୍ତାନା କାଲ୍ଲାକାଲ୍ଲାତାକି ଗେଲ୍ପି ଆନାଣି କିହାମାନେସି । ୧୩ ଆମ୍ବୁଆରି ପାଣାପାଟୁ ମାନୁଞ୍ଜି ଆଆନା ପାପୁ କିନେରି, ଏଞ୍ଜାରି ପଲ୍ଲଆ ଗାଟାରି ଲାକ ଗରି ଅଡେ ବାଟା କଡ଼ିତି ନେତେରି ତାଞ୍ଜାନା ହୁଡ଼ିତି ଦାରମ୍ବୁ ତଲେ ଏଞ୍ଜାରି ଆଙ୍ଗାତି ବାରେ ପାପୁ ସୁଦୁ କିହିମାଟେରି, ୧୪ ଇଦି ସାତା ଆହାମାନେ, ଇତିହି କ୍ରୀସ୍ତି ନେତେରି ସାତା ଆଏ, କି କାଟ୍ଲେଏତି ଜୀଞ୍ଜୁତି ସାୟେମି ତଲେ ଏଞ୍ଜାସି ଜାହାରାଇଁ ମାହାପୁରୁ ନକିତା ର ଦହି ହିଲାଆ ପୂଜାଲେହେଁ ହେରପିତେସି, ତାନି ନେତେରି ଏଚେକା ଗାଡି ନୀତାମାନି ମାହାପୁରୁଇଁ ସେବା କିହାଲି, ହାଞ୍ଜି କିନି କାମାତି ମା ଜୀଞ୍ଜୁତି ଅଣ୍ପୁତି ସୁଦୁ କିନେ !

୧୫ ଇଦାଆଁତାକି କ୍ରୀସ୍ତଏ ପୁଞ୍ଜି ରାଜିମାନାତି ମାଦିତାସି ଆହାମାନେସି, ଏନିକି ମୁଲୁତି ରାଜିମାନାତି ପାପୁ ମ୍ଲେକହାଲି ତାକି ହାହାମାନାକି ମାହାପୁରୁ ହାଟାମାନି ଲକ୍ଷୁ କାଲ୍ଲାକାଲ୍ଲାତି ଅଦିକାରା

ଆହାଲି ଆଞ୍ଜାମାନି ଗେଲ୍‌ପି ଆନାଣି ବେଟାଆନେରି ।

୧୭ ଇତିହାସ ରାଜିମାନା କିଞ୍ଚି ଆହାମାତି ରାଜିମାନା ଆହାମାନି ମାଣ୍ଡସିତି ହାନ୍ତି ପାରମାଣା ଲଡ଼ାମାନେ । ୧୭ ଇଞ୍ଜା ହାଡ଼ିସାରେ ରାଜିମାନା କିହାମାନାୟି ବାଡ଼ୁୟୁ ଆନେ, ଇତିହାସ ରାଜିମାନା କିହାମାନାସି ନୀତାମାନି ପାତେକା ଏଦି ଏଚେଲା ଜିକେଏ କାମାତା ଖାଏ । ୧୮ ଏଦାଆଁତାକି ତଲିତି ରାଜିମାନା ଜିକେଏ ନେତେରି ହିଲାଆନା ତାରି ଆହାହିଲାଆତେ । ୧୯ ତଲିଏ ମସା ମେରାତି ହୁକୁମି ଲକୁତାଣା ଖେକହେସି, ତାୟୁ ଏଞ୍ଜାସି କଡ଼ି ଅଡ଼େ ଗରିତି ନେତେରି ଏୟୁତଲେ ଆବହାନା ଏସବ ଜାଡ଼ାତି ଆକା ଅଡ଼େ ନେତେରି ଖାଣାଗାଟି ମେଣ୍ଡା ବାଣାୟାଁ ତଲେ ମେରା ପତି ଅଡ଼େ ବାରେ ଲକୁ ଲାକ ଡ଼ାଞ୍ଜିତେସି । ୨୦ ଏଞ୍ଜାସି ଏଲେଇଚେସି, “ଏମିନି ରାଜିମାନା ମାନଞ୍ଚି ଆହାଲି ମାହାପୁରୁ ମିଙ୍ଗେ ହୁକୁମି ହାହାମାଞ୍ଜାନେସି, ଇ ନେତେରି ଏ ରାଜିମାନାତି ତସିମାନେ ।” ୨୧ ଅଡ଼େ ଜିକେଏ ଏଲେକିହାସ ଏଞ୍ଜାସି ତୁମୁ ଇଲୁ ଅଡ଼େ ମାହାପୁରୁ ସେବାତାକି ବାରେ ଲଡ଼ାମାନି ଦିଶ୍‌ସୁ ଲାକ ଜିକେଏ ନେତେରି ଡ଼ାଞ୍ଜିତେସି । ୨୨ ସାତେଏ ମସାତି ମେରା ତଲେ ବାରେ ନେତେରି ତଲେ ଅବହା କିଞ୍ଚିଆନେ, ଅଡ଼େ ନେତେରି ଖାକହାନା ପାପୁ ମେଣ୍ଡାକେଏ ।

କ୍ରୀସ୍ତୀ ହାକିଟି ପାପୁ ମେଣ୍ଡାକିନେ

୨୩ ଏଦାଆଁତାକି ଲାକପୁରୁ କେପିତି ବାରେ ଦିଶ୍‌ସୁ ପୁଣ୍ଡିକିନିଲେହେଁ ପୂଜା ତଲେ ଅବଞ୍ଚି ଆନାୟି ମାତେ; ସାମା ଲାକପୁରୁ କେପିତି ବାରେ ଦିଶ୍‌ସୁ ଇ କାଜା ପୂଜା ତଲେ ଅବନାୟି ମାନେ । ୨୪ ଏନାୟି ମାଣ୍ଡସିୟାଁ କେୟୁଟି କେପାଆତାୟି ଇଲେତି ସୁଦୁ ଚାୟୁତା କ୍ରୀସ୍ତ ହାଜାମାନେସି, ଇଦି ସାତା କାତା, ଏଞ୍ଜାସି ଲାକପୁରୁ ହାଜାମାନେସି, ଏମ୍ବାଆଁ ଏଞ୍ଜାସି ମା ଖାକିଟି ନୀଏଁ ମାହାପୁରୁ ନକିତା ମାନେସି । ୨୫ ଜାହୁଦିୟାଁ କାଜା ପୂଜେରାଞ୍ଜା ଏନିକିଁ ବାର୍ସା ତାକି ବାର୍ସା ଏବକା ଲକୁ ତାକି ପୂଜା ହାନି ନେତେରି ଅହାନା ସୁଦୁ ଚାୟୁତା ହଡ଼ନେରି, ଏଲେକିହାସ ଏ କ୍ରୀସ୍ତ ଅଲେ ଅଲେ ତାଙ୍ଗେ ପୂଜା କିହାଲି ଏଦି ଏମ୍ବାଆଁ ହାଜାହିଲଅସି । ୨୬ ଆଡ଼ିହାସ ଦାରୁତି ଗାଡ଼ିଆଡ଼ି ବେଲାଟିଏ ଅଲେ ଅଲେ ତାଙ୍ଗେ ହାହାଲି ଆତେମା;

ସାମା ନୀର୍ଘ୍ଣ ଏଞ୍ଜାସି ଜୁଗୁ ରାନ୍ତି ବେଲ୍ଲାତା ତାନୁଏ ପୂଜାଲେହେଁ
 ହେରପାକତାମାନାକି ପାପୁ ହେକ କିୟାଲି ତଞ୍ଜା ଆହାମାନେସି
 । ୨୭ ବାରେ ଲକୁତାକି ଏନ୍ନିକି ରଣ୍ଡିଏ ଦେବା ହାନାୟି, ଅଡ଼େ
 ଏଦାନି ତାୟୁ ନୀହାୟି ମାନେ । ୨୮ ଏଲେକିହିଁଏ କ୍ରୀସ୍ତ ଜିକେଏ
 ହାରେକା ଲକୁତି ପାପୁ ତେକା ଅହାଲି ରଣ୍ଡିଏ ଦେବା ପୂଜା ଆହାଲି
 ହେରପାକତିତେସି, ଅଡ଼େ ଖେଣ୍ଡେ ପାପୁତି ତାକି ଆଏ, ସାମା ଆମିନି
 ଗାଟାରି ଏଞ୍ଜାଣାକ୍ କାଟାମାନେରି, ଏଞ୍ଜାରାକ୍ ଗେଲ୍ପାଲିତାକି
 ତଞ୍ଜାଆନେସି ।

୧୦

୧ ଇତିହିଁ ମସାତି ମେରା ଖାହିମାନି ଦିନାତି ନେହିଁ
 ସାୟୁଲେହେଁ ଆହାନା ଏ ବାରେତି ଖାଣା ଆଆତାକି ପୂଜେରାକ୍ମା
 ବାର୍ଯା ତାକି ବାର୍ଯା ଏ ରଣ୍ଡିଏ ରଲେତି ପୂଜା କିହିମାନାକି ପ୍ରାତାନା
 କିନାରାକ୍ ଏଚେଲାଞ୍ଜା ତୀରି କିହାଲି ଆଡ଼ଅରି । ୨ ଏଲେକିହିଁ
 ମାହାପୁରୁତି ସେବା କିନାରି ସାତେଏ ପାପୁତି ନରଞ୍ଜି ଆଡ଼ିହିଁମା,
 ଆଡ଼ିହିଁ ଏଞ୍ଜାରି ଅଡ଼େ ଜାହାରା ପାପୁ ଗାଟାତମି ଇଞ୍ଜି
 ଅଶ୍ପାଆତେରିମା, ଅଡ଼େ ବାରେ ପୂଜା କିନାୟି ତୁଞ୍ଜିତେମା ।
 ୩ ସାମା ଏଲେକିହିଁ ଆଆନା ବାର୍ଯା ତାକି ବାର୍ଯା ପୂଜା କିହିମାନାକି
 ମାଣସିକ୍ ତାନି ପାପୁତି ଅଶ୍ପି କିଞ୍ଜିଆହିମାନେ । ୪ ଇତିହିଁ ବାଟା
 କଡ଼ିତି ନେତେରି ଆଡ଼େ କି ଗରିତି ନେତେରି ଆଡ଼େ ଏଦି ଏଚେଲାଞ୍ଜା
 ମା ପାପୁ ମ୍ବେକ୍ହାଲି ଆଡ଼େଏ ।

୫ କ୍ରୀସ୍ତ ଦାର୍ଡିତା ଖାହାନା ଏଲେଇଞ୍ଜାମାଚେସି,

“ନୀନୁ ପୂଜା ଅଡ଼େ ଦାନା ହାନାଣି ରାହାଁ ଆଆତି,
 ସାମା ନୀନୁ ନାକ୍ଷେତାକି ର ଆକ୍ମା କେପିତି;

୬ ପାପୁତି ମ୍ବେକ୍ହାଲି ନୀନୁ ହିରୁତା ହୃତିନି ପୂଜା ଅଡ଼େ ଜନ୍ତୁ ଡାକିନାଣି
 ରାହାଁ ଆଆତି ।

୭ ଏତିବେଲା ନୀନୁ ଏଲେଇଚେଏଁ, ମାହାପୁରୁ, ନୀନୁ ଇମ୍ପାଆଁ ମାକ୍,
 ନୀ ଅଶ୍ପୁତି କାମା କିହାଲି,
 ଏନ୍ନିକିହିଁ ସାଫ୍ସୁରିତା ନା କାତା ରାସ୍କି ଆହାମାନେ ।”

୮ ଏଞ୍ଜାସି ତଲିଏ ଖେସ୍ତେସି, “ନାନୁ ମାଣ୍ଠସିତି ପାପୁ ମ୍ଲୋକ୍‌ହାଲି ପୂଜା କିନାଣି, ଦାନା ଇଞ୍ଜା ଜନ୍ତତି ହିରୁତା ହୃତିନାଣି ଅପିହଲଅତି; ଏ ବାରେ ନିଙ୍ଗେ ରାହାଁ କିୟାଲି ଆଡେଏ ।” ଈ ବାରେ ପୂଜା ମୋରାଲେହେଁ କିଞ୍ଜି ଆହାମାତି ଜିକେଏ, ୯ ଅଡେ ଜିକେଏ ଏଞ୍ଜାସି ଏଲେଇଚେସି, “ମାହାପୁରୁ ମୋହ୍‌ମୁ, ନାନୁ ନୀ ମନଲେହେଁ କାମା କିହାଲି ଖାହାମାଲ୍” ଏଦାଆଁତାକି ମାହାପୁରୁ ଈ ବାରେ ପୂଜା ଅପାଆନା, ଏଦାଣି ପିସାନା କ୍ରୀସ୍ତତି ପୂଜା ଅପିଡେସି । ୧୦ ଜୀସୁ କ୍ରୀସ୍ତ ରଣ୍ଡିଏ ଦେବା କାଲାକାଲାତାକି ତାନି ଆଙ୍ଗାତି ହେର୍‌ପାନା ମାହାପୁରୁତି ମନତଲେ କାମା କିହାଲିଏ, ତାନି ଏ ପୂଜାଟି, ମାର ବାରେ ଜାଣାତାୟି ପାପୁଟି ଗେଲ୍‌ପି ଆହାନା ସୁଦୁ ଗାଟାତାୟି ଆହାମାନାୟି ।

୧୧ ଅଡେ ଜିକେଏ ବାରେ ଜୀହୁଦି ପୂଜେରାଙ୍ଗା ବାରେଦିନା ସେବା କାମା କିହାଲି ଅଲେ ଅଲେ ରଲେଏତି ପୂଜା ହୀହାଲି ନିନେରି; ଈ ବାରେ ଏଚେଲା ପାପୁ ମ୍ଲୋକ୍‌ହାଲି ଆଡେଏ । ୧୨ ସାମା କ୍ରୀସ୍ତ ପାପୁ ତାକି ରଣ୍ଡିଏ ଦେବା ତାଙ୍ଗେ ପୂଜା ଅହାଲି ହେର୍‌ପାକଡତି ଡାୟୁ କାଲେଏତାକି ମାହାପୁରୁ ଟିଠନି ଟଟତା କୁଗିଡେସି; ୧୩ ମାହାପୁରୁ ତାନି ସାତୁୟାଲ୍ ଏଞ୍ଜାଣି କଡାୟା ଡଇ ଇଟାଆ ପାଡେକା ଏଞ୍ଜାସି ଏମ୍ବାଆଁ କାଡିମାନେସି । ୧୪ ଇଚିହ୍ ଖାରଇ ରଣ୍ଡିଏ ପୂଜା ହୀତି ତାଣାଟି ଏଞ୍ଜାସି ପାପୁଟି ସୁଦୁ ଆହାମାନି ଲକୁଇଁ କାଲେଏ ତାକି ତୀରି କିହାମାନେସି ।

୧୫ ସୁଦୁଜୀଞ୍ଜୁ ଜିକେଏ ମାଙ୍ଗେ ସାକି ହୀହାନା ଖେସିମାଞ୍ଜାନେ ।

୧୬ ଇଚିହ୍ ପ୍ରବୁ ଈ କାତା ଏଲେଇଞ୍ଜି ମାନେସି,

“ଏ ଖାନି ଦିନା ନାନୁ ଏଞ୍ଜାରିତଲେ ଆମିନି ପୁଠନି ରାଜିମାନା କିଇଁ,

ଏଡି ଇଦି, ନାନୁ ଏଞ୍ଜାରି ହିୟାତା ମସାତି ମୋରା ହୀଇଁ,

ଇଞ୍ଜା ଏଞ୍ଜାରି ମନତା ଏ ବାରେ ରାଡିଇଁ ।”

୧୭ ଅଡେ ଏଞ୍ଜାସି ଏଲେଇଞ୍ଜି ମାନେସି, “ନାନୁ ଏଞ୍ଜାରି ପାପୁ ଅଡେ ଲାଗେଏତି କାମାୟା ଏଚେଲାଖା ଖେଣ୍ଡେ ଅଣପଅଁ ।” ୧୮ ଇଦାଆଁତାକି ବାରେ ପାପୁ ଦହ୍ ମୋଣ୍‌ଜିସାରେ ଅଡେ ଏଚେଲାଖା ପୂଜା ହୀହାଲି ଲଡା ଆଏ ।

ମାହାପୁରୁ ତାଗେ ହାନାୟି

୧୯ ଏଦାଆଁତାକି ଏ ତାୟିୟା ଅଡ଼େ ତାଙ୍ଗିସ୍ତା, ଜୀସୁତି ହାହାମାନାକି ମାର ସୁଦୁ ଗାୟୁତା ହଡ଼ାଲି କାଜା ଅଦିକାରା ବେଟା ଆହାମାନାୟି, ୨୦ ଏଝାସି ଲେଟାମାନି ତାନି ଆଙ୍ଗା ଲେହେଁତି ଗାଟିନି ହିମ୍ବର ତଲେ ମାଙ୍ଗେତାକି ର ପୁଃନି ଇଞ୍ଜା ନୀଡିନି ଜିରୁ ଦେଟାମାନେସି । ୨୧ ମାହାପୁରୁ ଇଲ୍ଲୁ ନୀଏଁ ମା କାଜା ପୂଜେରା ତାଣା ମାନେ, ୨୨ ଏଦାଆଁତାକି ଖାଦୁ, ମାର ସୁଦୁ ହିୟା ଅଡ଼େ ଆଟ୍‌ଝା ନାମୁଟି ମାହାପୁରୁ ନକିତା ହାନ; ଇଚିହଁ ମାର ନୀଏଁ ପାପୁ ଅଣ୍‌ପୁଟି ଅଟ୍‌ଝି ଆହାମାନାୟି ଅଡ଼େ ମା ଆଙ୍ଗା କ୍ରୀସୁତି ନେତେରି ତଲେ ନରଝି ଆହାମାନେ । ୨୩ ମାର ଝେକ୍‌ହାମାନି ଆସା ବାର୍ସୁତି ବାଡ଼ୁ ତଲେ ଆହନ, ଏଦାଆଁତାକି ଇଚିହଁ ମାହାପୁରୁ ଆଞ୍ଜାମାନେସି, ଏଝାସି ଟିକାଣାତାସି; ୨୪ ଅଡ଼େ ଜୀଝୁ ନଝି ଆହାଲି ଇଞ୍ଜା ନେହଁ କାମା କିଝି କିହାଲିତାକି ରଅତାୟି ରଅଣାକ୍ ସାୟେମି କିହାଲି ମନ ହାନ, ୨୫ ଅଡ଼େ ଆମ୍ବା ଆମ୍ବାଆରି ମାହାପୁରୁ କୁଲମି ପ୍ରାତାନାତା ରୁଣ୍ଡା ଆହାଲି ହେଲା ଆନେରି, ମାର ଏଲେକଁ କିଆପ; ସାମା ରଅତାୟି ରଅଣାକ୍ ବାର୍ସୁ ହୀଝିଆନ, ଏଦାଆଁତାକି ଇଚିହଁ ପ୍ରବୁ ଖାନ୍ତି ଦିନା ତାଗେ ଝାହିମାନେ ଇଞ୍ଜାଁ ମେସିମାନାୟି ।

୨୬ ମା ନକିତା ସାତା ତଞ୍ଜା ଆଡି କେଟ ମାର ପୁଞ୍ଜି ପୁଞ୍ଜିହଁ ପାପୁ କିହିମାନାୟି, ଆତିହଁ ଏନି ପୂଜା ପାପୁଟି ଗେଲ୍‌ପାଲି ଆଡେଏ, ୨୭ ଆଡିହଁ ମାର ଝାହିମାନି କାଜା ନୀହାୟି ନକିତା ମାହାପୁରୁକ୍ ଅପାଆଗାଟି ଲକୁ ତାକି ମାନି ହିରୁତା ନାସା ଆନାଣି ଆଜାନା ତୟିନି ପିସପେ ମାଡି ଅଡ଼େ ଏଟକା ଏନି ତଣ୍ଡ ହିଲେଏ । ୨୮ ଆମ୍ବାଆସି ମସା ମେରାତି ମାନଝି ଆଆସାରେ, ଏଝାସି କାର୍ମା ମେସପି ଆଆନା ରିଆରି କି ତାନି ଜାଣା ସାକି ତଲେ ଦହଗାଟାସି ଇଞ୍ଜାଁ ପୁଞ୍ଜାନା, ଏଝାଣାକ୍ କାର୍ମା ମେହଆନା ହାନ୍ତି ତଣ୍ଡ ହୀଝିଆନେ । ୨୯ ଇଞ୍ଜାଁ ଅଣ୍‌ପାଦୁ ଆମ୍ବାଆସି ମାହାପୁରୁ ମୀରଏଣାକ୍ କଡ଼ା ତୁଇ ଝିସାମାନେସି, ପୁଃନି ରାଜିମାନାତି ଆମିନି ନେତେରି ତଲେ ଏଝାସି ସୁଦୁ ଆହାମାଚେସି, ଏଝାଣାକ୍ ଉଣା ଇଞ୍ଜାଁ ଅଣ୍‌ପାମାନେସି ଅଡ଼େ କାର୍ମା ହାନି ଜୀଝୁଟି ଅପାହିଲଅସି, ଏଝାସି ଏଚେକା ହାଚେଏ ତଣ୍ଡ ବେଟାଆଅସି ! ୩୦ ଇଚିହଁ ମାର ପୁଞ୍ଜାମାନାୟି, “ବାଦୁଲି ଅନାୟି ନା ଅଦିକାରା,

ନାନୁ ତାନି କାମାତି ପାଡ଼େୟି ହୀଇଁ” ଆମ୍ବାଆସି ଇ କାତା ଏଲେଇଞ୍ଜା
ମାନେସି, ଏଞ୍ଜାଣାଇଁ ନାନୁ ପୁଞ୍ଜାମାଇଁ, ଅଡ଼େ ଜିକେଏ “ପ୍ରବୁ ତାନି
ଲକୁଇଁ ନୀହାଁୟି କିନେସି ।” ୩୧ ନୀତାମାନି ମାହାପୁରୁ କେୟୁତା
ହେରୁଞ୍ଜିନାୟି ଏଡ଼ି ହାରେକା ଆଜିହପେତାୟି ।

୩୨ ସାମା ଉଦେଡ଼ି ମେସ୍ତି ତାୟୁ ଏତିବେଲାତା ମୀରୁ ହାରେକା
ଦୁକୁ କସ୍ତ ବେଟାଆହାନା ହାରୁଞ୍ଜି ଆହାହିଲଅତେରି, ମୀରୁ ଏ
ତଲି କାଲାତି ଅଣ୍ଡପାଦୁ; ସାମା ମୀରୁ ଏରେଲାଞ୍ଜା ହାରୁଞ୍ଜି ଆହା
ହୀଲଅତେରି । ୩୩ ରକଞ୍ଜାକି ଅପାଆ ଗାଟାତେରି ଅଡ଼େ କସ୍ତତା ଲାଜା
କିଞ୍ଜିଆହିମାରେରି, ଅରଞ୍ଜାକି ଏଲେକିହିଁଏ ମାହାପୁରୁ ଲେମ୍ବିମାନି
ଲକୁତଲେ ଆଣ୍ଡିମାରେରି । ୩୪ ଇଚିହିଁ ମୀରୁ କାୟିଦି ଗାଟାରି ତଲେ
ଆଣ୍ଡାନା ଦୁକୁ ବେଟା ଆହାମାରେରି, ଅଡ଼େ ମିଙ୍ଗେ ମୀ ହାରେକା
ନେହିଁ କାଲେଏତି ବାଡ଼କୁ ମାନେ, ଇଦାଆଁ ପୁଞ୍ଜାନା ରାହାଁତଲେ
ମୀ ଦନ ମାଣ୍ଡା ଅନାଣି ମୀରୁ ଅରୁହିମାରେରି । ୩୫ ଇଦାଆଁତାକି
ମୀରୁ, ମୀ ସାସା ପିହୁଆଦୁ ଇଚିହିଁ ଏମ୍ବାଟି ହାରେକା ଦାନା
ମାନେ । ୩୬ ମାହାପୁରୁତି ଅଣ୍ଡୁ ପୁରା କିହାନା ଏଞ୍ଜାସି ଆଞ୍ଜାମାନାଣି
ବେଟାଆହାଲି ଆଡ଼ିଦେରି, ଏଦାଆଁତାକି ମୀରୁ ସାସା ଆସାନା ଡ଼ୟାଦୁ
। ୩୭ ଇଚିହିଁ ଦାମ୍ବୁପତିତା ରାସ୍‌କି ଆହାମାନେ,

“ଇଚିହିଁ ହାରେକା ଉଣା ବେଲା ମାନେ,
ଆମ୍ବାଆସି ଞ୍ଜାନାୟି ମାନେ, ଏଞ୍ଜାସି ଞ୍ଜାନେସି;
ଅଡ଼େ ଏଞ୍ଜାସି ଞ୍ଜେଡ଼ା କିଅସି ।

୩୮ ନା ଦାମ୍ବୁତି ମାଣ୍ଡସି ନାମୁତଲେ ନୀଡ଼ିନାସି,
ସାମା ଆମ୍ବାଆସି ନା ଡାଣାଟି ଗୁଟା ଆନେସି,
ଆତିହିଁ ଏଞ୍ଜାଣି ତାଣା ନା ଜୀଞ୍ଜୁ ରାହାଁ ଆଏ ।”

୩୯ ସାମା ଆମ୍ବାଆରି ନାସା ଆହାଲି ଞ୍ଜେଣ୍ଡେ ଗୁଟା ଆନେରି, ମାମ୍ବୁ
ଏଞ୍ଜାରି ଗଚିତି ଲକୁ ଆଏ, ସାମା ଆମ୍ବାଆରି ଜୀଞ୍ଜୁତି ଗେଲ୍‌ପି ଆହାଲି
ନାମିନେରି, ମାମ୍ବୁ ଏଞ୍ଜାରି ଗଚିତି ଲକୁତମି ।

୧୧

ନାମୁ

୧ ନାମୁ ଇଚିହ୍ନ ଆସା କିହିମାନାଣି ବାରେ ସାତେଏ ବେଟାଆନାୟି,
ଇଞ୍ଜା ତଞ୍ଜାଆଆଗାଟାୟି ସାତେଏ ମାନେ ଇଞ୍ଜୁ ପୁନାୟିଏ ନାମୁ
। ୨ ତଲିତି ମା ଆକୁୟା ମାହାପୁରୁଇଁ ନାମାଲିଏ ମାହାପୁରୁ ତାଣା
ଝେଞ୍ଜିତେରି ।

୩ ✱ମାର ନାମୁଟି ପୁନାୟି, ବାରେ ଦାର୍ତ୍ତି ମାହାପୁରୁତି ବଲୁ ତଲେ
ଗାଡ଼ି ଆତେ, ଅଡ଼େ ଏନାୟିଝା ତଞ୍ଜା ଆଆଗାଟି ତାଣାଟି ତଞ୍ଜା ଆନାୟି
ଗାଡ଼ି ଆହା ହିଲେଏ ।

୪ ନାମୁଟି ହେବଲ ମାହାପୁରୁ ନକିତା କୟିନ କିହାଁ ନେହ୍ନ ପୂଜା
ହେରପିତେସି ଇଞ୍ଜା ଏଦାଣି ତଲେ ଏଝାସି ଦାର୍ମୁଗାଟାସି ଆତେସି;
ମାହାପୁରୁ ତାନୁଏ ତାନି ଦାନାତାକି ସାକି ହାତେସି, ଅଡ଼େ ଏଝାସି ହାଡ଼ି
ଜିକେଏ ନୀଞ୍ଜୁପାତେକା ନାମୁଟି କାତା ଆହିମାନେସି ।

୫ ନାମୁଟି ହନକ ହାଆନା ମାହାପୁରୁ ତାଣା ଅଢ଼ିଆତେସି ଇଞ୍ଜା
ମେଣ୍ଡିକିତେସି; ଅଡ଼େ ଏଝାସି ତଞ୍ଜା ଆଆତେସି, ଇଚିହ୍ନ ମାହାପୁରୁ
ଏଝାଣାଇଁ ଅହାନା ମେଣ୍ଡିକିତେସି, ଏଝାସି ମାହାପୁରୁତି ରାହା
ଗାଟାସି, ମେଣ୍ଡିନି ନକେଏ ଏଝାସି ଏ କାତା ଝେଞ୍ଜାମାଟେସି; ୬ ଅଡ଼େ
ନାମୁ ହିଲାଆନା ଆମ୍ବାଆସି ମାହାପୁରୁଇଁ ରାହାଁ କିହାଲି ଆଡ଼ଅସି,
ଇଚିହ୍ନ ମାହାପୁରୁ ସାତେଏ ମାନେସି ଇଞ୍ଜୁ, ଅଡ଼େ ଏଝାସି ତାଙ୍ଗେ
ପାରିନାରାଇଁ ତାନି କିତି କାମାତି ପାଡ଼େୟି ହାନେସି, ଇଦାଆଁ ଏଝାଣି
ତାଣା ଝାନ୍ତି ଲକୁ ନାମିନାୟିମାନେ ।

୭ ନାମୁଟି ନହ ଏ ବେଲା ପାତେକା ତଞ୍ଜା ଆଆଗାଟି କାତାତାକି
ହୁକୁମି ବେଟାଆହାନା ଆଜିତଲେ ତାନି କୁଟମି ଗେଲ୍ପାଲିତାକି ର
ଜାଜା କେପିତେସି, ଇଞ୍ଜା ଏ ନାମୁତଲେ ଏଝାସି ଦାର୍ତ୍ତିତି ଦହ କିହାନା
ନାମୁତଲେ ମାହାପୁରୁ ନକିତା ଦାର୍ମୁଗାଟାସି ଆତେସି ।

୮ ନାମୁଟି ଅବ୍ରାହାମ ମାହାପୁରୁ ତାଣାଟି ହାଟ୍ଟକି ଆହାଲିଏ, ଆମିନି
ଦେସା ଏଝାସି ବେଟାଆହାଲି ହାଜିମାଟେସି, କାତା ମାନୁଝି ଆହାନା
ଏମ୍ବାଆଁ ହାଜାଲି ହଡେସି, ଏଝାସି ଏମ୍ବିୟା ହାଜିମାନେସି, ଏଦାଆଁ
ଏଝାସି ପୁନାଆନା ଜିକେଏ ହଡ଼ାହାଟେସି । ୯ ନାମୁଟି ଏଝାସି ଏଟ୍ଟକା
ଦେସାତାରିଲେହେଁ ଆଞ୍ଜାମାନି ଦେସାତା ବାସା କିତେସି, ଏଝାସି
ତୁମୁତା ବାସା କିତେସି ଅଡ଼େ ଏଝାଣିଲେହେଁ ମାହାପୁରୁ ଆଞ୍ଜାଲିଏ

ଇସାହାକ ଅଡ଼େ ଜାକୁବ ଜିକେଏ ତୁମ୍ଭ ଇଲୁଡା ବାସା କିତେରି ।
 ୧୦ ଇଚିହିଁ ଆମିନି ଗାଡ଼ା କାଢ଼ଲଏ ତାକି ପୁନାଦି ଲେହେଁ ଅଡ଼େ
 ମାହାପୁରୁ ତାନ୍ତୁଏ କେପାମାନେସି, ଅବ୍ରାହାମ ଏ ଗାଡ଼ା ବେଟାଆହାଲି
 କାଡ଼ାମାଚେସି ।

୧୧ ନାମୁତଲେ ସାରା ବାଞ୍ଜେଣି ଆହାଁ ତାନ୍ତୁଏ ଜିକେଏ
 ଆଞ୍ଜାମାନାଣାଲ୍ ଦୁତି ବୁଡ଼ହି ଆହାମାଚି ଜିକେଏ ପୁରାମାସା ଆହାଲି
 ବାଡ଼ୁଲୁ ବେଟାଆଡ଼େ; ୧୨ ଅବ୍ରାହାମ ଦୁତି ବୁଡ଼ହା ଆହାମାଚି ଜିକେଏ
 ଏଞ୍ଜାଣି ତାଣାଟି ହାଗୁତି ହୁକାୟାଁ ଅଡ଼େ ସାମ୍ବୁରିତି ବାଞ୍ଜଲି ଲେହେଁ
 ଏଜିକିହାଲି ଆଡ଼ାଆଗାଟି ର ହାଢ଼େକା କୁଡ଼ା ଜାର୍ନା ଆଡ଼େରି ।

୧୩ ଏ ବାରେଜାଣା ମାହାପୁରୁଲ୍ ନାମାହାଁ ହାଡ଼େରି; ଏଞ୍ଜାରି
 ମାହାପୁରୁ ଆଞ୍ଜାମାଚାଣି ପ୍ଲୁଃଆତି ଜିକେଏ ହେକଟି ଏ ବାରେ
 ମେସାନା ରାହାଁ ଆଡ଼େରି ଇଞ୍ଜା ଦାର୍ତିତା ମାମ୍ବୁ ବୀଦେସା ଅଡ଼େ
 ବାସା କିହାମାନମି ଇଞ୍ଜା ଜଲିତେରି । ୧୪ ଇଚିହିଁ ଆମିନି
 ଗାଟାରି ଇଲେତି କାତା ଜଲିନେରି, ଏଞ୍ଜାରି ତାମି ଅଡ଼େ ର ଦେସା
 ପାରିମାନେରି ଇଞ୍ଜା ଝେସିମାନେରି । ୧୫ ଏଞ୍ଜାରି ଆମିନି ଦେସା
 ପିସା ଖାହାମାଚେରି, ଏ ଦେସାତି ଅଡ଼େ ଅଣ୍ପି ହିଲାଆଡେରି ।
 ଏଞ୍ଜାରି ଅଣ୍ପିତିହିଁ ମା ଏ ଦେସାତା ଝେଣ୍ଡେ ହାଜାଲି ଆଡ଼ିତେରିମା ।
 ୧୬ ସାମା ଏଞ୍ଜାରି ର ହାଢ଼େକା ନେହାଁଣି ଇଚିହିଁ ଲାକପୁରୁ ଦେସାତି
 ଅଣ୍ପିମାଚେରି; ଏଦାଆଁତାକି ମାହାପୁରୁଲ୍ ଏଞ୍ଜାରି ମା ମାହାପୁରୁ
 ଇଞ୍ଜା ଝେଜି କିହାଲି ଲାଜା ଆହା ହିଲାଆଡେରି, ଇଚିହିଁ ଏଞ୍ଜାସି
 ଏଞ୍ଜାରି ତାକି ର ଗାଡ଼ା ତୀରି କିହାମାନେସି ।

୧୭ ନାମୁତଲେ ଅବ୍ରାହାମ ତାୟିପାରି କିଞ୍ଜିଆହାଁ ଇସାହାକଲ୍
 ପୂଜା କିହାଲି ହେରପିଡେସି, ଆମିନି ମାଣ୍ଡି ଆଞ୍ଜାମାଚାଣି ମେଡ଼ା
 ଆହାମାଚେସି, ଆମ୍ବାଆରାଲ୍ ଏଲେଇଞ୍ଜାମାଚେସି, ୧୮ “ଇସାହାକ
 ତାଣାଟି ନୀ କୁଡ଼ା ଝେଜିନେରି, ଏ ମାଣ୍ଡି ତାନି ରଣ୍ଡିଏ ମୀରଏଣାଲ୍
 ଡାକିନି ପୂଜା ହୀହାଲି ହାଜିମାଚେସି ।” ୧୯ ଇସାହାକଲ୍ ମାହାପୁରୁ
 ହାଡ଼ାରି ତାଣାଟି ଜିକେଏ ନିକ୍‌ହାଲି ଆଡ଼ିମାନେସି ଇଞ୍ଜା
 ଅଣ୍ପାମାଚେସି, ଇଞ୍ଜା ଅବ୍ରାହାମ ସାତେଏ ଇସାହାକଲ୍ ହାକିଟି
 ଝେଣ୍ଡେ ବେଟାଆଡ଼େସି ।

୨୦ ନାମୁତଲେ ଇସାହାକ ଖାହିନି ଦିନାତା ନେହୁ ଆପେ ଇଞ୍ଜୁ ଅଣ୍ଟପାନା ଜାକୁବ ଅଡ଼େ ଏସାଝୁଇଁ ବର ହୀତେସି ।

୨୧ ନାମୁତଲେ ଜାକୁବ ହାନି ବେଲାତା ଜସେପତି ରୀ ମୀରକାଣି ବର ହୀତେସି, ଇଞ୍ଜା ତାନି କୁତା ବାଡ଼ଗାତା ଗେଣ୍ଟାନା ମାହାପୁରୁଇଁ ଜହରା କିତେସି ।

୨୨ ଜସେପ ହାନି ବେଲାତା ନାମୁତଲେ ଇସ୍ରାୟେଲ ଲକୁ ମିସର ଦେସାଟି ହଚାହାନି କାତା ଝେସ୍ତେସି । ଇଞ୍ଜା ତାନି ପେଡ଼କା ତୁମକା ତାକି ହୁକୁମି ହୀତେସି ।

୨୩ ନାମୁତଲେ ମସାତି ତାଲି ତାଞ୍ଜି ଏଝାଣି ଜାର୍ନାଆଡ଼ି ଦିନାଟିଏ ଏଝାଣାଇଁ ର ଅଜିତି କକାସି ଇଞ୍ଜୁ ମେସାନା ରାଜା ହୁକୁମି ଆଜାଆନା ତାନି ଲେଞ୍ଜୁ ପାତେକା ଏଝାଣାଇଁ ତୁକୁହାନା ଇଟାମାରୁ ।

୨୪ ମସା ନାମୁତଲେ ପାତାଆଡ଼ି ତାୟୁ ପାର ରାଜା ମାକ୍ନାତି ମୀରଏସି ଇଞ୍ଜୁ ଝେଙ୍ଗାଲି କୁତେସି । ୨୫ ଗାଡ଼େକା ତାକି ପାପୁ ତଲେ ରାହାଁ ବେଟାଆନାଣି କିହାଁ ମାହାପୁରୁ ଲକୁତଲେ ଦୁକୁ କସ୍ତ ଅରୁହିନାୟି ନେହାୟି ଇଞ୍ଜୁ ଅପିତେସି । ୨୬ ମିସର ବାରେ ଦେସାତି ଦନ କିହାଁ କ୍ରୀସ୍ତତି ନିନ୍ଦା ବେଟାଆନାୟି ବାରେକିହାଁ କାଜା ଦନ ଇଞ୍ଜୁ ଅଣ୍ଟପିତେସି, ଇତିହୁ ଏଝାସି ଖାନି ଦିନାଣା ବେଟାଆନି ଦନତି ସିନିକିତେସି ।

୨୭ ମସା ନାମୁତଲେ ରାଜା କପାତି ଆଜାଆନା ମିସର ଦେସା ପିସାହାଚେସି, ଇଞ୍ଜା ଆମ୍ବାଆସି ମେହୁଆଗାଟି ମାହାପୁରୁଇଁ ମେସିଲେହେଁ ଅରୁହାନା ତୁୟିତେସି । ୨୮ ନାମୁତଲେ ଏଝାସି ପିସପିଆନି ପାରୁତି ଅଡ଼େ ନେତେରି ତାଞ୍ଜିନି ମେରା ମାନଝି ଆଡେସି, ଏନିକି ପାଣ୍ଡା ମୀରକାଣି ପାୟିନାସି ଇସ୍ରାୟେଲ ମୀରକାଣି ତୀଗେଏ ।

୨୯ ଇସ୍ରାୟେଲ ଲକୁ ନାମୁତଲେ ଖାୟିତି ବୁମିତା ତାକିନି ଲେହେଁ ସୁପ ସାମ୍ବୁରି ଗାଣ୍ଡେତେରି, ସାମା ମିସର ଦେସାତାରି ଏଲେକି ଗାଣ୍ଡତାଲି ଅଣ୍ଟପାନା ସାମ୍ବୁରିତା ମୁଞ୍ଜାନା ହାଡେତେରି ।

୩୦ ଇସ୍ରାୟେଲ ଲକୁ ନାମୁତଲେ ସାତା ଦିନା ପାତେକା ଜିରିହ ଗାଡ଼ାତି କଟା ସାରିସୁରୁ ରେଚିତାୟୁ ବିଡ଼ହାହାଚେ । ୩୧ ନାମୁତଲେ ରାହାବ୍ ଦାରେଣି ଦେସା ସିନିକିହାଲି ମେଶେଏ ଖାହାମାତାରାଇଁ ଟାୟୁ

ହୀତାକି ମାହାପୁରୁଙ୍କୁ ମାନୁଥି ଆଆଗାଗାରି ତଲେ ନାସା ଆଆନା ହିତୁଡ଼ି ବେଟାଆଡ଼େ ।

୩୭ ଅଡ଼େ ଆଗାଡ଼ା ଏନାଆଁ ଖେସ୍ତାଇଁ, ଗିଦିୟନ, ବାରକ୍, ସାମ୍ବନ୍, ଜିପ୍ରହ, ଦାହୁଦ, ସାମୁୟେଲ ଅଡ଼େ ମାହାପୁରୁ ଅଣ୍ଟପୁଡ଼ି ବଲୁ ଖେହ୍ନାରି କାତା ମିଙ୍ଗେ ଖେସାଲି ବେଲା ହାଲେଏ । ୩୮ ନାମୁତଲେ ଏଞ୍ଜାରି ହାରେକା ରାଜିୟାଣି ଜୁଜୁ କିହାନା ଜୀଣା ଆଡ଼େରି, ଦାମ୍ବୁକାମା କିତେରି, ମାହାପୁରୁ ଆଞ୍ଜାମାନାଣି ବେଟାଆଡ଼େରି, ସିହଁ କ୍ଳାଃନିୟା ଗୁଡ଼ି ମୁଦା କିତେରି । ୩୯ ଏଞ୍ଜାରି ଆଜିହପେପତି ଡ଼ାଞ୍ଜିନି ହିରୁ ତୁପହେରି, ଟୁଣିନି ତାଣାଟି ପିସ୍ପିଆଡ଼େରି, ଏଞ୍ଜାରି ବାଡ଼ୁୟୁ ହିଲାଆ ବେଲାତା ବାଡ଼ୁୟୁ ବେଟାଆଡ଼େରି, ଜୁଜୁତା ଜୀଣା ଆଡ଼େରି, ଅଡ଼େ ମାହାପୁରୁଙ୍କୁ ନାମାଆତାରି ଜୁଜୁକିନି କସ୍‌କାଣି ଜୀଣାଆହାନା ପେରହାତୁସ୍ତେରି । ୪୦ ନାମୁଟି ଆୟସିକା ତାମି ଲକୁ ବିତାଟି ହାଡ଼ାରାଇଁ ନିପ୍‌କି ଆହାନା ଖେଣ୍ଡେ ବେଟାଆଡ଼େ; ଏତରଜାଣା ଖେଣ୍ଡେ ନିଙ୍ଗିନାଣି ମେଡ଼ା ଆହାଲିତାକି ଗେଲପି ଆହାଲି ମନ୍ କିଆନା ଆଜିହପେପତି କସ୍ତ ବେଟାଆଡ଼େରି । ୪୧ ଏତର ଜାଣାଇଁ ନିନ୍ଦା କିହାନା କାକ୍‌ହେରି, ଏତର ଜାଣାଇଁ ସାଟୁଣି ଡ଼ରି ତଲେ ଖେଡ଼େରି, ଏତର ଜାଣାଇଁ ହିକ୍‌ଣିୟା ତଲେ ଦସାନା କାୟିଦି ଇଲୁ ତାଣାଟି ତାୟିପାରି କିଞ୍ଚି ଆଡ଼େରି । ୪୨ ଆମ୍ବାଆରି ଖାଲକାତଲେ ପାୟୁଞ୍ଚି ଆଡ଼େରି, ଆମ୍ବାଆରି କରତ ତଲେ ରୀ ଗାଣ୍ଡୁ । କିହଁ ରାଡ଼ପିଆଡ଼େରି, ଇଞ୍ଜା କାଣ୍ଡାତଲେ ପାୟୁଞ୍ଚି ଆଡ଼େରି, ଆମ୍ବା ଆମ୍ବାଆରି ମେଣ୍ଡା ଅଡ଼େ ଗରି ତଲକା, ହୁଗାନା ରାନ୍ଦାକୁଚା ବେଟାଆଆନା କସ୍ତ, ଲାଗି ବେଟାଆହଁ ଇତାଲା ଆତାଲା ରେଡ଼େରି । ୪୩ ଏଞ୍ଜାରି ଦେସାଟି ଲକୁ ହିଲାଆ ତାଣା, ହରକାଣା, ପାହୁୟାଣା ଅଡ଼େ ଗାଣ୍ଡାଣା ବାସା କିତେରି; ଦାରଡ଼ିତି ଏଞ୍ଜାରାକି ନୀତାଲି ଜଗେ ହିଲାଆଡ଼େ ।

୪୪ ଏଞ୍ଜାରି ନାମୁତଲେ ଇ ବାରେ ନେହଁ ଖେଙ୍ଗାମାଟି ଜିକେଏ ଆଞ୍ଜାମାଗାଣି ବେଟାଆଆଡ଼େରି, ୪୫ ଇତିହଁ ମାହାପୁରୁ ମାଙ୍ଗେତାକି ହାରେକା ନେହଁଣି କିହଁ ଇଟାମାନେସି, ଏନିକଁ ଏଞ୍ଜାରି ମା ତଲେ ଏନିକଁ ତୀରି ଆନେରି ଇଞ୍ଜା ମାହାପୁରୁଡ଼ି ଅଣ୍ଟପୁ ମାଟେ ।

ମାହାପୁରୁ ମା ଆବା

୧ ଇଦାଆଁତାକି ଇଚେକା କାଜା ହାଗୁଲେହେଁ ସାକି ହୀହାମାନାରି ମା ସାରିସୁରୁ ମାନାକି, ଖାଦୁ ମାର ବାରେଡି ବଦୁ ଅଡେ ଆକ୍ମାମାଞ୍ଜାନି ପାପୁ ପିସାନା ନାମୁତା ନକିନାସି ଅଡେ ତୀରିକିନି ଜୀସୁଇଁ ସିନିକିହାନା ସାସାତଲେ ମା ନକିତା ତୀରିଆହାମାନି ଟାମୁତା ହଶନ । ୨ ମା ନାମୁ ତାକି ନକିନାସି ଅଡେ ନାମୁତା ବାର୍ସୁକିନି ଜୀସୁଇଁ ମାର ସିନିକିନ । ଏଝାସି ନକିତା ମାନି ରାହାଁ ବେଟାଆହାଲି ପାସି ମୁଣ୍ଡାତା ଲାଜା ବେଟାଆହାନା ହାନି ପାତେକା ଅରୁହିତେସି ଇଞ୍ଜିଁ ଏଝାସି ନୀଏଁ ମାହାପୁରୁ ସିଂଗାସାଣି ଟିଃନି ଟଟତା କୁଗାମାନେସି ।

୩ ମାରୁ ଏନିକିଁ ମୀ ମନତା ଖାହୁ ଖାହୁଅତେରି; ଇଦାଆଁତାକି ପାପୁ ଗାଟାରି ତାଣାଟି ତାନି କପାଟି ଏଚେକା କସୁ ଅରୁହିତେସି, ଏଝାଣି କାତା ମାରୁ ଅଣପାଦୁ । ୪ ମାରୁ ପାପୁ କପାଟି ଜୁଜୁ କିହାନା ନୀଏଁ ପାତେକା ମୀ ନେତେରି ହାନି ପାତେକା ଆକ୍ମା ହିଲଅତେରି । ୫ ମାହାପୁରୁ ମିଙ୍ଗେ ମୀରକାତେରି ଲେହେଁ ଝେସାମାଞ୍ଜାନି, ସାସାହାନି କାତା ବାଣାଆଡେରି କି ?

“ଏ ନା ମାରଏଶାତି, ପ୍ରବୁ ସାଲୁଝି କିୟାନାଣି ଉଜେଏତାୟି ଇଞ୍ଜିଁ ଇନାଆନି,
ଆଆତ୍ ଏଝାଣି ତାଣାଟି ଦାକା ବେଟାଆଡ଼ିସାରେ ସାସା ପିହୁଆନି;

୬ ଏନାଆଁତାକି ଇଚିହୁଁ ପ୍ରବୁ ଆମ୍ବାଆରାଇଁ ଜୀଝୁ ନନେସି,
ଏଝାଣାଇଁ ଜାଗ୍ରାତା କିହାଁ ଜାପୁନେସି ଅଡେ ଆମିନି ମୀରଏଶାଇଁ ଆବିନେସି, ଏଝାଣାଇଁ ସାସି ହୀନେସି ।”

୭ ନେହାଁତେରି ଆହାଲି କସୁ ଅରୁହି ମାଞ୍ଜେରି, ମାହାପୁରୁ ମିଙ୍ଗେ ମୀରକା ଲେହେଁ ଲେମ୍ବିମାଞ୍ଜାନେସି, ଇଚିହୁଁ ଆବା ଆମ୍ବାଆରାଇଁ ତଣ୍ଡୁ ହୀଅସି ଇଲେଡି ମୀରଏସି ଆମ୍ବାଆସି ମାନେସି ? 「ସାମା ଆମିନି ତଣ୍ଡୁତା ବାରେ ଆଣ୍ଡିନେରି, ଇଞ୍ଜା ମାରୁ ଏମ୍ବାଆଁ ଆଣ୍ଡାଆତାତେରି, ଆତିହୁଁ ମାରୁ ମୀରକା ଆଆନା ଦାଡେଣି ମୀରକା ଆଡେରି । ୯ ଅଡେ ଜିକେଏ, ମା ଦାର୍ଡିତି ତାଞ୍ଜିୟାଁ ମାଙ୍ଗେ ସାସି ହୀୟାତି ଜିକେଏ ଏଝାରାଇଁ ମାର ମାନି କିତାୟି, ଆତିହୁଁ ମା ଲାକପୁରୁଡି ଆବାଇଁ ଏଚେ ହାଡେକା ମାନୁଝି ଆହାନା ଜୀଝୁ ବେଟା ଆଆୟି ?

୧୦ ମା ଦାରତ୍ତିତ ତାଞ୍ଜିୟା ତାନି ଅଶ୍ଵପୁତା ନେହ୍ ଆନିଲେହେଁ ମାଞ୍ଜେ ଗାଡ଼େକା ଦିନାତାକି ସାସ୍ତି ହିୟାତେରି; ସାମା ମାର ଏନିକ୍ ମାହାପୁରୁତି ସୁଦୁତା ଆଶ୍ଵାଲି ଆଡ଼ିନାୟି, ଇଦାଆଁତାକି ମାହାପୁରୁ ମା ନେହ୍ ତାକି ମାଞ୍ଜେ ଡଣ୍ଡ ହିୟାନେସି । ୧୧ ମାର ସାସ୍ତି ବେଟାଆନାୟି ରାହାଁଗାଟାୟି ଆଆନା ଦୁକୁ ଗାଟାୟି ଆନେ, ଆଡ଼ିଜିକେଏ ଆନିନି ଗାଟାରି ଏମ୍ବାଟି ଜାପାମାନେରି, ତାୟୁ ଏଞ୍ଜାରାକି ହିଡ଼ଡ଼ିତି ପାଡ଼େୟି ଲେହେଁ ଦାମ୍ବୁତି ପାଡ଼େୟି ବେଟାଆନେରି ।

ଝେହ୍ନାୟି ଇଞ୍ଜା ଜାଗ୍ରାତା କିନାୟି

୧୨ ଇଦାଆଁତାକି ମୀରୁ ବାଡ଼ୁୟୁ ହିଲାଆ କେସ୍ତା ପେର୍ଦ୍ ଅଡ଼େ ବାଡ଼ୁୟୁ ହିଲାଆ ମେଣ୍ଡାୟାଁ ବାଡ଼ୁୟୁ କିଦୁ । ୧୩ ସଲକେ ଜିରୁତା ତାକାଦୁ; ଆଡ଼ିହ୍, ମୀ ସଟା ଆଡ଼ି କତା ଆଡ଼ାଆଗାଟାୟି ଆଆନା ନେହ୍ ଆନେ ।

୧୪ ବାରେଜାଣା ତଲେ ହିଡ଼ଡ଼ି ତଲେ ମାଞ୍ଜାଲି ଅଶ୍ଵପାଦୁ, ଅଡ଼େ ସୁଦୁଗାଟାସି ଆଆନା ଆମ୍ବାଆସି ପ୍ରବୁଇଁ ମେସାଲି ଆଡ଼ଅସି, ଏମ୍ବାଆଁ ତୀରେତଲେ ସିନିକିଦୁ । ୧୫ ଏଡ଼େତା ଆମ୍ବାଆସି ମାହାପୁରୁତି କାର୍ମାମେହ୍ନି ତାଣାଟି ନସ୍ତୁ ଆନେସି ଇଞ୍ଜା ଏନି କାମ୍ବେଲି ତାକି ନେୟାଁନା ପାତା ଆହାଁ ମିଞ୍ଜେ ନସ୍ତୁ କିୟାନେ ଅଡ଼େ ଏମ୍ବାଟି ହାଡ଼େକା ପଲ୍ଲଆ ଗାଟାରି ଆନେରି; ୧୬ ଏସାଞ୍ଜୁ ଲେହେଁ ଆମ୍ବାଆସି ଦାରିଗାଟାସି କି ଦାମ୍ବୁ ହିଲାଆଗାଟାଣି ଲେହେଁ ଆଆପେସି; ଏଞ୍ଜାସି ର ଅଲିତି ରାନ୍ଦା ତାକି ତାନି କାଜା ମୀରଏଣି ପାଣା ପାରଟା ମାଚେସି । ୧୭ ମୀରୁ ଏଦାଆଁ ପୁଞ୍ଜାମାଞ୍ଜେରି, ତାୟୁ ଏଞ୍ଜାସି ଆଡ଼ା ତାଣାଟି ବର ବେଟାଆହାଲି ଅଶ୍ଵପିତିହ୍ ଜିକେଏ ବେଟାଆହାଲି ଆଡ଼ାଆଡେସି, ଅଡ଼େ ମନ ଝେଟ୍‌ହାଲି ତାକି କାଶ୍ଟୁ ରୁକ୍‌ହିହ୍ ପାରାଲି ଅଶ୍ଵପିତେସି ଆଡ଼ିଜିକେଏ ଏଦାଆଁ କିହାଲି ପାରୁ ବେଟାଆଆଡେସି ।

୧୮ ଇସ୍ତାୟେଲତି ଲକୁ ଲେହେଁ ମୀରୁ ସିୟନ ହରୁତା ଡ଼ାଞ୍ଜିମାଟି ହିରୁ, କିଟିକିଟି ଆନ୍ଦେରି, ରୁଞ୍ଜାଗାଲି, ୧୯ ତୀଡ଼ି ଉକିନି ହାଡ଼ା ଇଞ୍ଜା କାତା ଝେହ୍ନି ହାଡ଼ା ତାଗେ ଞ୍ଜାଆଡେ, ଝେନାରି ଏ ହାଡ଼ା ଝେଞ୍ଜାନା ଏନିକ୍ ଏଞ୍ଜାରାକି ଅଡ଼େ ଏନି କାତା ଝେସ୍ପି ଆଏ, ଇଦାଆଁ ବାଡ଼ିମାଲା ମାଚେରି; ୨୦ “ଇଡ଼ିହ୍ ଏନି ଜନ୍ତ ଜିକେଏ ଏ ହରୁତି

ତୀରିନେ, ଆତିହ୍ନି ଏଦାନି ଖାଲକାତଲେ ଇରହାନା ପାୟିଓଆନେ ।” ଇ ଆମିନି ହୁକୁମି ହାପକି ଆହାମାଚେ, ଏଦାଆଁ ଏଞ୍ଜାରି ଅରହାଲି ଆଡାଆଚେରି; ୨୧ ଏଦି ଆଜିହ୍ନିପେ ତଞ୍ଜା ଆହିମାଚାକି ମସା ଜିକେଏ ଏଲେଇଚେସି, “ନାନୁ ଜିକେଏ ଆଜିତାକି ତୀରିଗିମାଲ୍ ।”

୨୨ ସାମା ମୀରୁ ସିୟନ ହରୁ ଅଡ଼େ ନୀତାମାନି ମାହାପୁରୁତି ଗାଡ଼ା, ଇଚିହ୍ନି ଲାକପୁରୁତି ଜିରୁସାଲମତା, ହାରେକା ଦୂତୁୟା ଖାହାମାଚେରି ଏମ୍ବାଆଁ ଖାହାମାଞ୍ଜେରି । ୨୩ ଅଡ଼େ ଏ ପାଣ୍ଡାମା ମୀରକାତି କୁଲମି ଆମ୍ବାଆରି ଦରୁ ଲାକପୁରୁ ରାସକି ଆହାମାନେ ଅଡ଼େ ବାରେତି ନୀହାୟି କିନି ମାହାପୁରୁ ନକିତା ତୀରିକିଓି ଆହାମାନି ଦାମୁତି ଜାଝୁୟା । ୨୪ ପୁଃନି ରାଜିମାନା ମାଦିତି ଜାସୁ, ଇଞ୍ଜା ଆମିନି ତାଞ୍ଜାମାନି ତାନି ନେତେରି, ହେବଲ ନେତେରି କିହାଁ ହାରେକା ନେହ୍ନି, ଏ ନେତେରି ତାଗେ ଖାହାମାଞ୍ଜେରି ।

୨୫ ହେଶୁ ଆମ୍ବାଆସି କାତା ଝେସିମାଞ୍ଜାନେସି ଏଦାଆଁ ଝେନଅମି ଇନାଆଦୁ, ଇଚିହ୍ନି ଆମ୍ବାଆସି ଦାର୍ତତିତା ହୁକୁମି ହୀତେସି, ଏଞ୍ଜାଣାଲ୍ ତାକି ଗେଲପି ଆଆତେରି, ଆତିହ୍ନି ଆମ୍ବାଆସି ଲାକପୁରୁତି ହୁକୁମି ହାହିମାଞ୍ଜାନେସି, ଏଞ୍ଜାଣି ତାଣାଟି ଏଟକା ହାଟିସାରେ ମାର ଗେଲପିଆଆୟି, ଇଦି ଏଚେକା ସାତା ଆଏ ? ୨୬ ଏଚିଚେଲା ଏଞ୍ଜାଣି ହାଡ଼ା ଦାର୍ତତିଲ୍ ଖୀଟହେ, ସାମା ନୀଏଁ ଏଞ୍ଜାସି ପାରମାଣା କିହାଁ ଝେସାମାଞ୍ଜାନେସି, “ନାନୁ ଅଡ଼େ ଝେଶ୍ଟେ ଖୀରୁଇ ଦାର୍ତତିଲ୍ ଖୀଟଲ୍, ଏଦି ଆଏ ସାମା ହାଗୁ ପାକାଲ୍ ଜିକେଏ ଖୀଟଲ୍ ।” ୨୭ ଅଡ଼େ ଝେଶ୍ଟେ ଇଞ୍ଜା ଇନି ତାଣାଟି ଇଦାଆଁ ପୁଞ୍ଜିମାନାୟି, ଆଟ୍ଞା ଗାଟାୟି ତୟାଲି ତାକି ଖୀଡିନାୟି, ଇଚିହ୍ନି ଗାଡ଼ି ଆହାମାନାୟି ବାରେ ତିରି ମୀଶନେ ।

୨୮ ଇଦାଆଁତାକି ଖାଦୁ ଖୀତାଆଗାଟି ରାଜିତି ବେଟାଆହାନା ମାର ଏ କାର୍ମାତି ପିହ୍ଆପ ଇଞ୍ଜା ରାହାତଲେ ଆଜି ଅଡ଼େ ମାନିଟି ମାହାପୁରୁ ରାହାଁ ଆନିଲେହେଁ ଜହରା କିନି । ୨୯ ଏନାଆଁତାକି ଇଚିହ୍ନି ମା ମାହାପୁରୁ ନାସାକିନି ହିରୁ ଲେହେଁତାସି ।

୧୩

ମାହାପୁରୁଲ୍ ରାହାଁ କିନାୟି

^୧ କ୍ରୀସ୍ତୀନା ତାୟିୟାଁ ଅଡ଼େ ତାଈସ୍ତା ରଅତେରି ରଅଣାଈଁ ଜୀଝୁ ନଝୁ । ^୨ ପୁନାଆତି ଗତାୟାଁଣି ସେବା କିହାଲି ବାଣା ଆଆଦୁ, ଇଚିହଁ ଏଲେକିତାକି ଏଚରଜାଣା ପୁନାଆନା ଲାକପୁରୁତି ଦୂତୁୟାଁଣି ସେବା କିହାମାନେରି । ^୩ କାୟିଦିତା ମାନାରାଇଁ ମୀରୁ ଏଞ୍ଜାରିତଲେ କାୟିଦିତା ମାନି ଲେହେଁ ଅଣ୍ପାଦୁ ଇଞ୍ଜା ଆଈା ତଲେ ମାନାକି ଦୁକୁ କସ୍ତ ବେଟାଆହିମାନାରି ତଲେ ସମାନା ଦୁକୁ କସ୍ତ ବେଟାଆହିଲି ଅଣ୍ପାଦୁ ।

^୪ ବୀହା ବାରେ ଲକୁ ନକିତା ନେହାୟି ଆପେ, ଇଞ୍ଜା ତକ୍ତି ଅଡ଼େ ତକ୍ରା ମାନି ତଲେ ଡୟାପୁ, ଏନାଆଁତାକି ଇଚିହଁ ମାହାପୁରୁ ଲାଗେଏତି କାମା ଅଡ଼େ ଦାରିକାମା କିନାରାଇଁ ନାହାଁୟି କିନେସି ।

^୫ ତାକିନି ତାକୁତା ଦନ ଜୁପକା ଆଆଦୁ, ମିଙ୍ଗେ ଏନାୟି ମାନେ, ଏମ୍ପାଆଁ ରାହାଁତଲେ ମାଞ୍ଜୁ, ଇଚିହଁ ମାହାପୁରୁ ଏଲେଇଞ୍ଜା ମାନେସି, “ନାନୁ ନିଙ୍ଗେ ଏଚେଲାଞ୍ଜା ପିସ୍ତୁଆଁ, ନାନୁ ନିଙ୍ଗେ ଏଚେଲାଞ୍ଜା ବାଣାଆୟିଆଁ ।” ^୬ ଇଦାଆଁତାକି ମାର ସାସାତଲେ ଏଲେଇଞ୍ଜାଲି ଆଡ଼ିନାୟି,

“ପ୍ରବୁ ନା ସାୟେମି ଆନାସି,

ନାନୁ ଇଚାଣି ଆଜଅଁ,

ମାଗ୍ସି ନାଙ୍ଗେ ଏନାଆଁ କିହାଲି ଆଡାନେସି ?”

^୭ ଆମିନି ଗାଗାରି ମିଙ୍ଗେ ମାହାପୁରୁତି ବଲୁ ଝେସାମାଞ୍ଜାତେରି, ମୀରୁ ଏଲେତି କାଜାରାଇଁ ମାନି କିଦୁ; ଏଞ୍ଜାରି ଏନିକଁ ନୀତାମାଚେରି ଇଞ୍ଜା ହାଡ଼େରି, ଏଦାଆଁ ଅଣ୍ପାଦା ଏଞ୍ଜାରି ନାମିତି ଲେହେଁ ମୀରୁ ଜିକେଏ ନାମାଦୁ । ^୮ ଜୀସୁ କ୍ରୀସ୍ତ ରେଝଏନି, ନୀଞ୍ଜୁ ଅଡ଼େ କାଲେଏ ତାକି ସମାନା ଡୟିନେସି । ^୯ ଏଟକା ଅଡ଼େ ଅର ରଲେତି ଜାପୁନି ତାଣା କିଲିବିଲି ଆଆଦୁ, ଇଚିହଁ ତିନି ରାନ୍ଦାତା ଆଏ, ସାମା ମାହାପୁରୁ କାର୍ମାଟି ହିୟାଁ ତୀରି ଆନାୟି ନେହେଁ; ଆମିନି ଗାଗାରି ତିନି ରାନ୍ଦାତି ମେରା ମାନଞ୍ଜି ଆନେରି, ଏଞ୍ଜାରାକି ଏନି ଲାବା ଆଏ ।

^{୧୦} ମା ଇଲେତି ର ପୁଜାପିଣ୍ଡା ମାନେ, ଆମିନି ପୁଜା ପିଣ୍ଡାତି ଦିଶସୁଈଁ ତୁମ୍ଭ ଇଲୁତା ସେବାକିନି ପୁଜେରାଈା ତିଞ୍ଜାଲି ଅଦିକାରା ହିଲେଏ ।

^{୧୧} ଇଚିହଁ ଜୀହୁଦିୟାଁତି କାଜା ପୁଜେରା ପାପୁ ତାକି ହେରୁପାମାନି ଜନ୍ତୁତି ନେତେରି ସୁଦୁ ଚାୟୁତା ଅନେସି; ସାମା ଏ ଜନ୍ତୁତି ଆଈା

ବାରେ ସାମ୍ବନ୍ଧ ପାଳନା ତାରାହାଁ ହୁଡ଼ିଆନେ । ୧୭ ଇଦାଆଁତାକି ଜୀସୁ ଜିକେଏ ତାନି ନେତେରି ତଲେ ଏନିକି ଲକ୍ଷ୍ମଣି ସୁଦୁ କିନେସି, ଇଦାଆଁତାକି ଗାଡ଼ା ପାଳନା ହାଡ଼େସି । ୧୮ ଇଦାଆଁତାକି ଖାଦୁ, ମାର ଜିକେଏ ଏଞ୍ଜାଣିଲେହେଁ ନିନ୍ଦା ଅରୁହାନା ଗାଡ଼ା ପାଳନା ଏଞ୍ଜାଣି ତାଣା ହାନ । ୧୯ ଏଦାଆଁତାକି ଇଚିହଁ ଇମ୍ପାଆଁ ବାରେ ଦିନାତାକି ମାଲେ ଡ଼ୟିନି ଗାଡ଼ା ହିଲେଏ, ସାମା ମାର ତାୟୁ ଖାହିମାନି ଗାଡ଼ାତି ବେଟାଆହାଲି ପାରିମାନାୟି । ୨୦ ଇଦାଆଁତାକି ଖାଦୁ, ମାର ଜୀସୁ ତାଣାଟି ମାହାପୁରୁଇଁ ଜହରାତି ପୂଜା କିନ, ଇଚିହଁ ତାନି ଦରୁ ଜଲିମାନି ଗୁଡ଼ିତି ବାରେଦିନା ହେରପିନ । ୨୧ ଏଟକା ତାରାଇଁ ସାୟେମି କିହାଲି ବାଣା ଆଆଦୁ, ଇଚିହଁ ଇଲେତି ପୂଜା କାମାତା ମାହାପୁରୁ ରାହାଁ ଆନେସି ।

୨୨ ମୀ କାଜାରାଇଁ ମାନୁଞ୍ଜି ଆହାନା ଏଞ୍ଜାରାଇଁ ମାନି କିଦୁ, ଇଚିହଁ ଆମିନି ଗାଟାରି ମାହାପୁରୁକି ଲେକା ହୀନାୟି ମାନେ, ଏଞ୍ଜାରିଲେହେଁ ଏଞ୍ଜାରି ମୀ ଜୀଞ୍ଜୁତି କାଟିମାନେରି, ଏନିକି ଏଞ୍ଜାରି ଏଦାଆଁ ଦୁକୁ ତଲେ କିଆନା ରାହାଁତଲେ କିହାଲି ଆଡ଼ିନେରି; ଦୁକୁ ତଲେ କିତିସାରେ ମିଲେ ଏନି ଲାବା ହିଲେଏ ।

୨୩ ମାଲେତାକି ପ୍ରାତାନା କିଦୁ, ଇଚିହଁ ମା ନାମୁ ମାନେ, ମା ଅଣପୁ ନେହାୟି ଆପେ, ଅଡ଼େ ବାରେ କାମାତା ନେହଁ ମାଣ୍ଡକି ଆହାଲି ମାମୁ ଅଣପିମାନମି । ୨୪ ଅଡ଼େ ନାନୁ ମୀ ତାଣା ଏନିକି ତବେ ଖାୟାଲି ଆଡ଼ିଇଁ, ଏଦାଆଁତାକି ମାହାପୁରୁ ତାଣା ପ୍ରାତାନା କିହାଲି ନାନୁ ମିଲେ ହାଡ଼େକା ବାତିମାଲିମାଞ୍ଜାଇଁ ।

ରାନ୍ତି ପ୍ରାତାନା

୨୫ ଆମିନି ହିଡ଼ି ହିୟାନି ମାହାପୁରୁ କାଲକାଲା ଡ଼ୟିନି ରାଜିମାନାତି ନେତେରି ତାକି, କାଜା ମେଣ୍ଡା ଗଡ଼ୁ ଇଚିହଁ ମା ପ୍ରବୁ ଜୀସୁଇଁ ହାଡ଼ାରି ତାଣାଟି ନୀଟହା ମାନେସି; ୨୬ ଏଞ୍ଜାଣି ନକିତା ଏନାୟି ନେହାୟି, ଏଦାଆଁ ଏଞ୍ଜାସି ମା ହିୟାତା ଜୀସୁ ଜୀସୁ ତାଣାଟି ରାପୁହାନା ତାନି ମନଲେହେଁ କିହାଲି ମିଲେ ବାରେ ନେହଁ କାମା କିୟାପେସି । ଏଞ୍ଜାଣାକି କାଲକାଲାତି ଗାଞ୍ଜୁରମି ଆପେ ! ଆଡ଼େନ ।

ଆକୁତି ରାନ୍ତି କାତା

୨୨ ଏ ତାୟି ତାଜିସ୍ତା, ନାନୁ ମିଙ୍ଗେ ବାତିମାଲିମାଞ୍ଜାଇଁ, ଇ ଜାଗ୍ରାତା କିଞ୍ଜିକିନି କାତା ସାସା ଇଟାନା ମନ ହୀଦୁ, ଇଞ୍ଜା ନାନୁ ରାହାଁ କିହାଲି ଇ ଉଣା ଆକୁ ମିଙ୍ଗେ ରାଚାମାଇଁ । ୨୩ ମା ତାୟି ତିମତି କାୟିଦିଟି ତବେ ପିସ୍ପି ଆହାମାନେସି ଇଞ୍ଜି ପୁଞ୍ଜେରି, ଏଞ୍ଜାସି ତବେ ଖାଡ଼ିସାରେ ଏଞ୍ଜାଣିତଲେ ନାନୁ ମା ତାଣା ବେଚିଞ୍ଜାହାଲି ଖାଇଁ ।

୨୪ ମା ବାରେ କାଜାରାଇଁ ଅଡ଼େ ମାହାପୁରୁ ଲକୁଇଁ ଜହରା ଖେହୁଦୁ । ଏମିନି ତାୟିୟା ଇଟାଲି ଦେସାଟି ଖାହାମାନେରି, ଏଞ୍ଜାରି ମିଙ୍ଗେ ଜହରା ଖେସିମାଞ୍ଜାନେରି ।

୨୫ ମାହାପୁରୁତି କାର୍ମାମେହନାୟି ବାରେତେରି ମିଙ୍ଗେତାକି ଆୟାପେ ।

ପୁସ୍ତକ ଫେରା

The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33